

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839




FAAVAEINA 1839

SULU O FEPUARI 2010

Faatonu: Ph. 27881, Cellphone: 7715037 - Main Office: Ph. 24414 - website: www.cccs.org.ws

Fesoasoani mai nisi o Faalapotopotoga ma Aulotu i Fafo mo Mafatiaga i le Sunami



TALU LAVA DNA TULA'I mai le mala faanatura lea na aafia ai lo tatou atunuu i le aso 29 Setema 2009, ma maliliu ai nisi o o tatou tagata e tusa o le 200 i

Samoa nei faapea ma Amerika Samoa, ua le gata le auina mai pea o nisi o fesoasoani tupe i le tatou Ekalesia, mo galuega e toe faaleleia ai alalafaga na aafia.

Mai le Matagaluega a Aukilani i Matu, Susuga Ioritana Tanielu F.T. - \$18,000. (O le \$32,000 na tuuina mai mulimuli, *faaacuau itulau e 5*

SALEAPAGA:

O ATA: O Saleapaga, o se tasi lea o alalafaga na matua faatama'ia e le galulolo o le aso 29 Setema 2009. Tafea fale turisi; malepe le aai; maliliu ma le to'a 22 o tagata o le nuu. I le taimi nei, toetoe lava uma i uta le nuu. Ua fai fale fou i le mea o loo iai faatoaga a le nuu. Lima pe sefulu tausaga oi lumana'i, ae tulai mai se aai tele i le mea ua iai nei le

nuu. O le mea e matua manaia ai le nofoaga lea, ona o lea ua fau maota i faatoaga. E le tau toe savali i le faatoaga ona o lea ua mautu atu nei i faatoaga, ma fau ai le aai fou. A oo foi ina valita le alagalue o loo faataamilo i le nofoaga fou, ona matua lelei lava lea. O le aai fou foi, o le a fai ma maa faamanatu o le mala faanatura na aafia ai Saleapaga.

Oo atu le asiasiga a le Sulu Samoa, o galulue mai le Susuga i le faafeagaiga EFKS o Uaea (Ualesi) Isaraelu, ma nisi o

lana aulotu i le fauina o lo latou hall, poo le maota o le aulotu, i tupe o fesoasoani ua maua. A o le ata lena o si tama'i fale o loo mau ai nei le faifeau, le Susuga ia Uaea, ma lona ata lena e i luga. O loo salalau solo ai mea e fai ai le galuega. O le isi ituala, o le a fau ai i se aso, se malumalu ma le maota o le faifeau.

O Saleapaga o se tasi o alalafaga o loo fesoasoani iai faalapotopotoga o loo ta'ua i le tala autu o loo i luga.

Kuatemane Ulutui F.S., Pule Fou o le Fale Lomitusi

Ua faamaonia le tofiaina o le Susuga Kuatemane Ulutui F.S. e fai ma pule fou o le Lomitusi, poo le Malua Printing & Publishing, ma o le masina o Ianuari 2010 na amata ai i le Fale Lomitusi.

Osiga Feagaiga a Magiagi ma Tuanai Uesile

O le Aso Faraile 5 Fepuari 2010 na osia ai le Feagaiga a le aulotu i Magiagi, ma le latou faafeagaiga fou, le Susuga ia Tuanai Uesile ma le faletua ia Upu.

O le Susuga ia Tuanai Uesile sa a'oga i le Kolisi i Malua mai le 2002 i le 2005. O le 2006 na su'e ai i le Kolisi lava i Malua lona faailoga o le BD. Ona faiaoga ai lea i le Kolisi a Maluafou mai le tausaga e 2007 seia oo ina valaauina e le aulotu a Magiagi.

Osiga Feagaiga a Maasina ma Laupama Tokone Solomona

O le Aso Faraile 5 Fepuari 2010 na osia ai le Feagaiga a le aulotu i Maasina, Fagaloa, ma le latou faafeagaiga fou, le Susuga Laupama Tokone Solomona ma le faletua o Vaitoomuli. Ina ua i'u mai Laupama ma le Kolisi Faafaiifeau i Malua, ona faiaoga ai lea i le Congregational Senior College i Vaisigano, seia oo ina valaauina e le aulotu i Maasina.

Foai o le Fanua i Lano mo le Ekalesia EFKS

Ua 180 tausaga o le Ekalesia i Samoa a o le uluai taimi leni ua mautu ma aloa'ia ai faale-tulafono le nofoaga poo se fanua o le lotu LMS/EFKS i Lano.

Mafua lea ona ua foa'i motu mo le Ekalesia se fanua e tusa o le tasi ma le afa eka, e le Afioga Faalavane Sosene ma le aiga, aua maota o le galuega a le Atua i Lano.

(Silasila i le tala atoa i itulau i totomu o le Lomiga leni o le Sulu Samoa).

Hale - ua Faatau e le Atua Povi!

O le tala mo tupulaga talavou o loo i le itulau e 13. O le a'oga seminare ua le mafai ona totogi a latou aitalafu. Ona fai ai lea o se fononatalo, ma tatalo ai se alii e igoa ia Hale i le Atua, se'i alofa mai ma faatauina atu nisi o ana mau povi i luga o atumauga, ae aumai le tupe e totogi ai a latou aitalafu. Faitau iai i le tala.

Semina a le Ofisa Tutotonu-Aoaoga Kerisiano-Falelomitusi o Malua-ma le Ricoh

O le Aso Tofi 25 Fepuari, na faia ai le semina mo le Ofisa Tutotonu a le Ekalesia, i le potu fononatalo i le Maota o le

Ioane Viliamu i Apia. Sa auai uma afaigaluega mai le Ofisa o Aoaoga Kerisiano, Falelomitusi o Malua, le Ricoh, Ofisa o Tupe faapea ma le Ofisa o le Failautusi Aoaoga.

O le Afioga i le Failautusi Aoaoga le Susuga Rev. Dr. Iutisone Salevao, sa ia taitaiina lea semina.

O mataupu, o mea lava tau i le auaunaga a tagata faigaluega a le Ekalesia o loo galulue i ia ofisa. O le faiga o galuega, o le faamaoni, o le va fealofa'i ma tagata, o ala e faafaigaluegaima ai tagata, o totogi ma itula e galulue ai, o livi ma aso ma'i ma le tele o isi mea e tatau ona manatua e faaleleia ai le galuega, aua le tautuaina o le Ekalesia, ae tainane tagata e autovaa atu i le Ofisa Tutotonu ma ona Lala, mo soo se mataupu e manaomia ai le auaunaga a le Ofisa. Na aso atoa na faaogaina i lea semina.

To'atele Teine mo le Kolisi i Papauta i leni tausaga

Ua ese leni tausaga, 2010! Ua matua toatele lava teine o loo ua iai nei i le Kolisi a Teine Papauta, pe a faatusatusa atu i le tele o tausaga ua mavae.

Tausaga e 2007, na o le 41 teine sa iai i le a'oga. 2008, na o le 40; 2009, na o le 44. O se tasi lava lea itu sa faitio ai nisi, ona o le le toatele o ni teine i le aoga. Ma e sa manatu ai nisi, e mafua ona o le le lelei o le a'oga. A o faaiuga o su'ega o le tausaga ua mavae, na iloa ai, e lelei Papauta, pe a faatusatusa atu i i'uga o su'ega a isi aoga a le Ekalesia.

A o le tausaga leni, e to'a 128 teine o loo ua iai nei i le Kolisi a Teine Papauta! O se fuainumera matua lapo'a lava.

O le tausaga leni ua amata ai le Yr 13. E le toe tau su'eina se a'oga e alu iai pe a i'u mai i le Yr. 12.

Ua matua'i toatele le aoga; o le faailoga o le siitia o le tulaga o le

Kolisi. Ua iai foi le vasega faapitoa ua ta'ua o le "Vocational Class", poo le vasega e aoaoina ai matata esecese, na amata i le 2009. O le vasega lea e aoaoina ai teine i mataupu tau su'isu'i, kuka, tu ma aga faa-Samoa moni, faiga o meataulima, tomai faakomipiuta, aoaoina o le tatusi ma le tomai faafonokarafi. O mataupu nei, e tele ina ave i a'oga politeki.

E le taumate e le lau silafia e le toatele o le Ekalesia, ma Samoa foi, o le Kolisi a Teine i Papauta, o le kolisi pito i lea lea i totonu o Samoa. O le nofoaga foi, e matua malu puipuia ai lava teine aua e nofo tumau. E te le tau fesili ma masalosalo poo alu ea lau tama i le aoga, i le mea o loo nofo ai i Apia pe leai. A aoga i Papauta, e mautinoa lava le a'oga lelei, 'ai lelei, moe lelei, i se nofoaga matua saogalemu lava. Ae mafai foi ona tausavali pe a mananao iai matua. Ae sili le nofo tumau.

Force and Love

The exercise of force is contrary to the principles of God's government; He desires only the service of love; and love cannot be commanded; it cannot be won by force or authority. Only by love is love awakened.

O LE LAUGA.....

TUSI FAITAU:

Feagaiga Tuai: **KENESE 6: 5 - 22**
Feagaiga Fou: **KOLOSE 1: 9 - 14**

MATUA: Kenese 6: 9 – “**O le tala leneci ia Noa; o Noa o le tagata amiotonu ia ma le sao i e tupulaga ma ia; sa la feoai o le Atua ma Noa**”.

MANATU AUTU: “SAVALIGA MA LE ATUA”

Ua e savali i se savaliga umi na o oe? E leai se fiafia poo se tofilemu e tupu mai ai. Na o le lagona o le faavaivai ma le musuā, o le logotiga ma le faatumulia i le paiē ma le augata e savali. E oo lava ina le taunuu i le nofoaga na fuafuaina e taunuu i ai.

A ua lua savavali la ma sau uo, poo lou toalua foi i le ala umi lava lea e tasi? E leai lava se mamao o le ala auā e faatumulia pea i le fiafia e savavali faatasi ma talatalanoa fiafia. A leai foi ni tala, e savavali filemu lava ao loo lagona le mafanafana o le savavali faatasi. E faatupu fiafia e savali, ma faapea foi ona le lagona se vaivai a ua na o le faatupula'ia o le malosi.

A ua outou savavali la faatasi ma nisi tagata tou te masani pe lē masani foi i le ala lava lea? E ui lava ina le masani ma nisi ae ua lagona lava le fiafia e savavali faatasi ma mafuta atu i le ala. E galo le mamao ina ua amata ona masani ma avea ma sootaga ua faatumulia i le tamaoaiaga o mafauaiga ma manatu. E taunuu atu i le nofoaga e i'u ai le ala mo oe, ua e fia savali pea ina ua mafanafana masaniga.

O le ata manino foi lea o la lua savaliga ma le Atua. E moni lava ua faaatoatoaina e ala i le faatuatua lou soifua faaKerisiano, ae le faigofie lava ona e savali na o oe ma le manatu o loo faatasi le Atua ma oe. E le fesiligaina le auai o le Atua, ao oe ma lou valaauina e fai ma Kerisiano, ua faapea ona fesiligaina pe afai e te fia ola tutoatasi pea mai isi tagata.

O le savaliga ma le Atua, o le faatinoga o le ola faatuatua i le va feagai ai ma le Atua atoa ma isi tagata. O lou ta'u Kerisianoina e faavae i le li'o o le fanua a le Atua i totonu o le mafutaga o le aiga o le Atua, o loo avea ai oe ma atalii ma afafine o le Atua. O le uiga tonu lea o le tala ia Noa. Lea ua faailoa mai e le matua – “O le tala leneci ia Noa; o Noa o le tagata

amiotonu ia ma le sao i e tupulaga ma ia; sa la feoai o le Atua ma Noa.”

E le o tauamiotonuina Noa na o ia i lo la va ma lona Atua. Ae o loo tauamiotonuina i le li'o o lana tupulaga. O loo tauamiotonuina i totonu o le sosaiete o tagata o loo soifua ma ola ai ma faatino ai lona ola faatuatua i lona Atua.

O le tonu o le amio a Noa na iloa i lona va fesootai ma isi ona uso-a-tagata. Na faatino ai le finagalo o le Atua i mea e ao ona ia faia mo le manuia o lona nuu ma lona aiga, ma tagata uma o loo mau ma ia.

Ae i le va feagai ai o Noa ma lona Atua, fai mai le matua ua “sao”. O lona uiga ua aunoa ma se mea e tauleagaina ai o ia i luma o lona Atua. Ua savali e tusa ma le taitaiga a le Agaga o le Atua. Ua leai se faafiatonu ma se ola faamaualuga, a ua savali ma le loto maulalo i luma o lona Atua.

Fai mai le vaega mulimuli o le matua, “sa la feoa'i o le Atua ma Noa.” E le o “Noa ma le Atua”, ao le “Atua ma Noa”. E muamua le Atua, ae lona lua Noa. Ua manino i lea faaupuga le tulaga o le savaliga. O le savaliga na falagolago tasi ai Noa i le taitaiga a lona Atua. E le i faamoemoe lava Noa i sona iloa ma sona malosi. Peitai ua lafoai lona tagata faatauvaa i aao o lona Atua e mautinoa lona malu ai mai mea leaga uma o le olaga e ono lamatia ai o ia.

O loo manino atili lea tulaga i le fuaiupu e 8, “A o Noa, ua alofagia o ia e le Alii.” A faafaigofie lea fuaitau ona faapea lea, ‘ua maua Noa e le alofa tunoa o le Alii’. O le mafuaga tonu lea o le solosolo lelei o le savaliga a le Alii ma Noa, ona o le Alii o loo faavae ai le mafutaga.

Tele tagata o loo leo tetele i nei aso ma fiafia e tala'i ua “latou maua le Alii” ma ua faaolaina. O le mea moni, e tumu ia faaupuga i le faamaualuga ma le fiasili i luma o le Atua. O ia foi tautinoga o loo faavae i o latou lava manatu ma lagona faaletagata, a ua taomia i lalo le Alii. O le ala foi lea o le leo tetele i luma o tagata ma fiafia e faailoa o i latou ua faaolaina ina ua latou maua le Alii, ona o loo fefete le loto i lagona masani faaletagata o le fia iloa ma le fiasili.

E iloa lava i faaupuga le faalagolago i loo latou lava potu ma le iloa. O le fesili, E maua e se tagata le Atua e aunoa ma le Atua? E leai se iloa, se malosi ma se mafai o ia i tatou e mafai ai ona tatou maua le Alii. Ao ia lava i lona alofa tunoa ua maua ai i tatou, ma tatou maua ai le avanoa tatou te talia ai o

ia i le faatuatua e avea ma o tatou Faaola. O le amataga o le faatuatua o le loto maulalo, o loo tatou lē iloa ma lē mafai o se mea, ma tatou faalagolago tasi ai i le mana o le Atua.

O le savaliga a le Atua ma Noa, na mafua i le alofa tunoa o le Atua ma le loto maulalo o Noa. O le mafuaga foi lea o le sologa manuia o le olaga o Noa i totonu o lona aiga ma lona nuu ona o le faalagolago ma le loto maulalo i le taitaiga a lona Atua. O le savaliga na faatinoina lava i totonu o le li'o o tagata i aso uma, auā o totonu lava o le li'o o tagata na maua ai Noa e le alofa tunoa o le Atua.

I totonu lava la o le sosaiete o tagata, o lona aiga ma lona nu'u, o loo faatinoina ai le ola usitai ma le ola faatuatua, le alofa ma le amiomamā, le ola faimeatonu ma le ola faapaiaina. E le i alu Noa i luga o se mauga poo se nofoaga tuufua foi e faatino ai le savaliga ma lona Atua. O totonu lava o lona aiga ma lona nuu. O i na tonu na tauamiotonuina ai Noa ma sao ai i luma o lona Atua.

O le mafanafana tele o le mafutaga a le Atua ma Noa, ina ua tupu le faatuatua ma ua masani Noa i le finagalo o le Atua, ua mafua ai ona faasoa e le Atua ona mafatiaga ia Noa. O mafatiaga alofa o le Atua i amio a tagata ona o le malosi o le agasala. Mafatiaga o le lē amanaiaina e le tagata o le Atua o loo savavali faatasi pea ma i latou i vaega uma o le ala – i le solo lelei poo le faigata - e ui lava ina lē iloa e le tagata.

Lea ua faailoa e le Atua i lana uo o Noa, lona salamō ina ua ia faia tagata o le lalolagi, ma ua faapea ona tiga ai lona finagalo. A lē salamō ai le Atua o lea ua agasala faasoloatoa tagata. Ua leai se tuaoi o mea leaga, ua leaga mai lava i le loto ma le mafauaiga o loo amio ma faatinoga. O le faaupuga masani – ua fufula ola le agasala. Ae se manū lava si toaina o Noa, o loo maua i ai se mafanafana mo le finagalo mafatia ma le tiga o le Atua.

E mafai ona manatu nisi e lē tataua ona mafatia ma tiga le Atua auā o le Atua e atoatoa lona mana ma lona malosi, e leai se mea e mafai ona afaina ai o ia. E moni lava lea taofi. Pau lava o lea, o le mea tonu lea e tulaga ese ai le Atua o loo tatou faatuatua ma talitonu i ai. O le Atua mafuta ona o lona alofa tunoa. O le faapogai lea o lona finagalo ina ia foafoaina le lalolagi ma mea uma ua tumu ai, ina ia mafuta faavavau ma ia. E le mafai e se isi lava atua ona fai lea tulaga. A ua faia e le Atua soifua o lē ua faailoa mai e ia o ia lava ona o lona fia mafuta ma savavali faatasi ma ana mea uma na fai.

O le mafuaga lea o le mafatia o lona finagalo ma ua tiga alofa ai o ia ona o le tulaga ua oo i ai le tagata. Le lalolagi na faia i lona alofa ina ia manuia ma matagofie, lea ua mataga. Le tagata na faia i lona faatusa ina ia foliga ia te ia, lea na ia “silasila atu” i ai ua “matua lelei.” Ao lea ua matuā iloga ona “aina e le agasala

ma ua faaleagaina.

Toe lava o si toecaina o Noa o loo tumau i le savaliga ma le Atua. O le mea tulaga ese ua tupu, o le faamaoni o Noa i le savaliga ma le Atua, na lava lea e faasoaina ai lona aiga atoa ma meaola e tele mo le faafouina o le lalolagi. Ua talafeagai mo Noa le pese masani – “Ua faafetai, ua faafetai, ua malie mata e vaai. Ua tasi lava oe, ua tasi lava oe, i lo’u nei faamoemoe.” Ua malie le silasila ma le faafouga a le Atua i le amiotonu ma le amio sa'o o lana auuina o Noa ao la savavali. Lea ua fai nei ma vai malū i le finagalo mafatia o le Atua ona o amioaga a tagata.

O le fausiaina o le va'a o le faailoga o le faamoemoe faaola o le Atua mo Noa, o lona aiga, atoa ma meaola o le foafoaga. Ua amata ia Noa le isi savaliga fou a le Atua ma lana foafoaga fou pe a uma le lolo. O le va'a, o le faailoga o le Talalelei o le faaolataga. O le lolo, o le faailoga o le malaia ma le faafanoga. O le mavae o le lolo, o lona uiga e le tofatumoanaina le faamoemoe o le Atua mo lana foafoaga. Ae oso pea malama o taeao fou e faia e le Atua mo ona tagata ma ana mea uma na fai.

O le ave'a o se tagata ma amataga o le faafouina o le foafoaga a le Atua o se tulaga mao'a e tele. Lea ua ave'a Noa ma lona aiga ma amataga fou o le foafoaga a le Atua. A ua mafua lava lea tulaga ona o le faamaoni o Noa i le savaliga ma lona Atua. Ua manino le aafiaga o lea savaliga i le ola o Noa – ua faatupulaia ai lona faatuatua i lona Atua, ma ua ave'a ma ala o le faatamaoigaina i le tumu atoatoa o le Atua, ua ia fai ai le amiotonu a le Atua i totonu o lona aiga ma lona nuu, ma sao ai i luma o lona Atua.

O le tulaga tonu lava lea o loo faamalosi'au ai le Aposetolo o Paulo i le Ekalesia i Kolose e pei ona ta'ua i le vaega o le tusi ua faamauiina. E talitonu Paulo o le olaga o le Kerisiano, o le savaliga lava ma le Atua i totonu o le li'o o le aiga o le Atua, atoa ai ma le faamoemoe lautele o le faaolataga a le Atua mo mea uma o lana foafoaga aoao. “ia outou savavali e tusa ma le Alii, ina ia fiafia mai o ia ia te outou i mea uma, ma ia outou fua mai i galuega lelei uma lava, ma ia tupu pea lo outou iloa lelei o le Atua.”

O le savaliga ma le Atua, e fua mai ai le olaga o le tagata i galuega lelei uma lava, ma ave'a ai ma ala e tupu atili ai lona iloa lelei o le Atua ma lona finagalo. O mea ia e faafiafiaina ai e tagata le Atua i mea uma latou te faafinoia i le ola nei.

O le tasi lea o ata e fiafia le aposetolo e faaoga i ana tusitusiga – o le ata faa-faatoaga, e pei ona faaalua i upu o loo ia faaogaina - “fua mai” ma le “tupu ae”. Pau lava o lea, o loo feū'a i ia upu pe a fua i le natura o laau. E tatau ona muamua le “tupu ae” ona faatoa oo lea i le “fua mai”. O le mea moni pe a toto se laau, e tatau ona ‘tupu ae’ muamua ona faatoa

‘fua mai’ lea. Ao lea ua fai mai le aposetolo e ‘fua mai’ muamua ona faatoa ‘tupu ae’ lea.

Peitai o loo tautala le aposetolo i le laau faaleagaga o le ola faatuatua i le Atua. O le savaliga a le Atua ma le tagata i le faatuatua – e amata i le ‘fua mai’ i galuega lelei uma lava, ona ‘tupu ae’ lea o lona iloa lelei o le Atua. O le ola faatuatua e le faatali taeao e fua ai i galuega lelei. E fua lava i le taimi e talitonu ai ma faatuatua i le Atua. Ao faaalua i galuega lelei le ola faatuatua, e faatuputupula'ia ai le iloa o le Atua ma lona finagalo. E oo lava ina masani lelei ma le Atua i mea uma. Ma faapena ona faasoaina i ai e le Atua ona mafatiaga ona o le alofa i tagata ma o latou olaga.

O le ituaiga tagata lena e faafiafia i le finagalo o le Atua i mea uma ina ua tauamiotonuina o ia i totonu o lona aiga ma lona nuu, ma faapea ona sao lana amio i luma o lona Atua. O le taunuuga taua lea ma le matagofie o le savaliga a le Atua ma ona tagata faatuatua. E ave'a ai le tagata faatuatua i le Atua ma amataga fou o le foafoaga faafou a le Atua.

Le fanau e a le Atua, o a mai la tatou savaliga ma le Atua i lena foi vaitau o le soifuaga o loo soifua ma tatou ola ai? Ua manino e lē finagalo le Atua e te savali na o oe ma le faamoemoe ua lava le Atua lua te savavali. Ao le savaliga i totonu o le li'o o le fanau a le Atua i nai o tatou aiga ma nuu atoa ma le Ekalesia. O totonu lava o le sosaiete o tagata ma le siomaga o mea uma o le foafoaga a le Atua, na valaauina i ai i tatou e savavali ai faatasi ma le Atua ma isi ao faafinoia lo tatou ola faatuatua i le Atua.

O le valaau a le Talalelei, ia tatou savavali faatasi ma le Atua ma isi – o tatou aiga, o tatou nuu, a tatou uo ma o tatou fili, ma e o fai i tatou ma o latou fili. E gata lava le faigata o le savavali faatasi i le amataga, ae oo loa ina masani i le ala atoa ma le savaliga o faia, ona amata foi lea ona mau sootaga fou e ave'a ma faatupu malosi ao gasolo le faigamalaga poo le savaliga.

O tulaga taua o le savaliga, ia muamua pea le Atua ae tatou mulimuli atu ia te ia. Tatou te muamua loa tupu loa ma le faalavelave. O lo tatou feoa'i ma faatasina le Atua i mea tatou te mananao ai ma oo lava i le tulaga ua tatou fausia ai le Atua i lo tatou lava faatusa. O lo tatou tuu o le Atua i mea e faamalieina ai o tatou manaoga ma tuinanauga.

O le agasala lava lea mai le amataga o le fia muamua i le savaliga ma le Atua. O lea foi na fai ma faafitauli i le taimi o Noa. O tagata le fia faalogo i le taitaiga a le Atua ae fai o latou lava loto. Na o le tiga o le finagalo o le Atua ma oo mai ai le malaia ma le faaumatiaina.

E i ai foi le agasala o le lē fua mai i galuega lelei uma lava. Le agasala o le ola faafitauli ma le ola faavaivai. O le faafitauli o lea agasala, e leai ma se agai i luma o le ola

faatuatua ma lē iloa ai lava le finagalo o le Atua. E le inu lava lea ituaiga tagata i le suamalie o faamanuiga a le Atua i vaipanoa uma o le ola.

Na tagi lava i lima nai o tatou matua ua tofafa mai tia sã. Mativa ma lē tagolima, ae na talitonu ma le faatuatua i le Atua ma tauivi ai i le mea e gata ai lo latou malosi. O galuega lelei na a matua lea ua tatou ‘ae’ae ai i le manuia ona ua faamanuaina e le Atua a latou galuega. Sa talitonu o tatou matua i vavega, ma na vaai foi i latou i vavega. Ao lea ua galo le fatu na toto e matua, ua loto vaivai ma tu'ua'i i le taugata o le soifuaga ona faitoia lea o le Ekalesia.

E fau ma soloi i aulotu ma nuu ituaiga tagata ia. Tagata e ola faafitauli ma manatu o le finagalo lea o le Atua, ia faamamaavega i tagata vaivai. Ua toso mai le Atua e faamalie ai lo tatou loto vaivai. Ona lafi ai lava lea o le tagata malosi ae loto vaivai i tua o nai tagata o loo vaivai ae taumafai.

E oo mai lava le malaga a le malii ma le oti i ia ituaiga tagata, e le maimoa lava i manuia o le Atua o loo faulai i vaipanoa uma o le olaga o loo soifua ai. Leaga ua le mafai ona tupu le faatuatua ma iloa moni le Atua ma lona finagalo ma ana faamanuiga, ina ua lē fua mai i galuega lelei uma lava, ae na o le tomumu, faalogologotiga, loto vaivai ma faavaivai loto i tagata matititi ae tetele loto.

Ua manaomia le faafouina o lea ituaiga olaga ua faavaivai ai le toatele o tagata o le Ekalesia. E manaomia ai ni Noa o totoe i le Ekalesia e fai ma faamafanafanaga i le Atua, ma fai ma ala o le faafouga a le Atua mo lana Ekalesia ma lana foafoaga.

O le faafouina o le foafoaga ia Noa ma lona aiga, ua le tumau foi ona o amio lava a tagata. Ao le Afio mai o le Atua e ala ia Iesu Keriso, o le faaaliga atoatoa lea o le savaliga ma le Atua e atoatoa ona lelei ma ua ave'a ai ma foafoaga fou a le Atua, ina ua mafai ona faatoilaloina le tiapolo ma ana ‘au, ma ua faatuina le pule a le Atua i le lagi ma le lalolagi, nei e oo i le faavavau. E lē i faigofie le savaliga na uia e le Alii auā na oo lava i puapuga o le satauro.

O le toetu manumalo o Iesu Keriso mai le oti ma le tuugamau, o le faatoilaloina lea o le malosi o le agasala ma le oti. O le taeao fou o le malamalama fou o le foafoaga o le Atua. Ua faafouina mea uma i le toto o lona satauro ma le malosi o le mana o lona Agaga.

Ua fai ai le Alii toetu ma malosi fou i le savaliga a le Atua ma ona tagata faatuatua. Ia manuia le savaliga o lena foi masina. AMENE.

Saunia: Rev. Taipisia Leilua

EFKS MOATA'A

Suesuega i le Feagaiga Tuai

O LE A LE TULAGA FAATUPU O TAVITA?

Faatomuaga:

E le fou le fesili ua fai ma ulutala o lenei pepa, ae ua toe asia ona ua fai pea ma luitau i le au suesue.

O le autu o lenei suesuega ia faatupu manatu Afioga Paia a le Atua i le galuega folafola a le Afaigaluega o le Tala Lelei. O le mea mautinoa, e felanulanua'i le tulaga faatupu o Tavita. O se tupu faeaina i lona faamaoni ma le lelei, a o se tupu foi e vaivai ma toilalo. Aisea ua fete'ena'i ai lona tulaga faatupu? Ae faapefea ona faamataupu silisili nei fete'ena'iga? O nisi ia o fesili e fia agai iai se faamatalaga, ma o le metotia o loo faaogaina i lenei pepa, o le faavasegaina lea o tala i le tulaga o loo iai (literary method).

O talaaga o le tupu o Tavita, amata mai lona valaauina seia oo i lana nofoaiga, o loo faamaoni i vaega tetele se fa o le 1-2 Samuelu.

1. O le tulai mai o Tavita (1 Sam 16-2 Sam 4)
2. O lona tulaga faatupu (2 Sam 5-8)
3. O le faaauina o lana nofoaiga (2 Sam 9-20)

4. O lona tulaga faatupu (2 Sam 21-24)

I le vaaiga lautele, e sosoo le tulai mai o Tavita (1) ma faamatalaga i lona tulaga faatupu (2). E sosoo foi le faaauina o lana nofoaiga (3) ma isi faamatalaga i lona tulaga faatupu (4). E le gata ina faamatala faalua lona tulaga faatupu, ae feteenai foi lona faamatalaga. O le faamoemoe la o lenei pepa, ia suesueina le vaega (4) e faatusatusa i le vaega (2).

I le faamatalaga muamua o loo tulai mai i le 2 Sam 5-8, e ono ni vaega o loo faatulaga mai faa-ekisi (chiastic):

- a - O le lisi o ituaiga o Isaraelu (5.1-16)
- e - O le taua ma Filisitia (5.17-25)
- x - O le faamautuina o Tavita e ituaiga o Isaraelu: le atolaau (6.1-23)
- x' - O le faamautuina o Tavita i lona fale: le feagaiga (7.1-29)
- e' - O le taua ma malo tuaoi ai (8.15-18)
- a' - O le lisi o faaululuga o le malo o Tavita (8,15-18)

A faatusatusa la le faatulagaina faa-ekisi o nei vaega, ona iloa ai lea o ni suiga i le

alualu o le tulaga faatupu o Tavita. I le faatusatusaga o lisi [a-a'], e atagia ai le suia o ituaiga o Isaraelu e faaululuga o lona malo. I le faatusatusaga o taua a Tavita (e-e'), e le gata ina tau ma Filisitia, ae ua sii taua atu i isi malo tuaoi ai. O se faaaliga lea o le maoo'e o lona malosi. I le faatusatusaga foi o le faamautuina o Tavita (x-x'), e iloa ai ua le toe faavae i lana pule i faaululuga o ituaiga o Isaraelu ma le atolaau. A ua faavae i le "lona fale" ma le "feagaiga faavavau": "...ou te faatumauina foi le nofoalii o lona malo e faavavau....Ou te faamautuina lou aiga ma lou malo e faavavau i ou luma; e mausali lou nofoalii e faavavau" (2 Sam 7.13,16).

Ina ua tulai mai Tavita e fai ma tupu (1 Sam 16-2 Sam 4), ua faamatalaina e le 2 Sam 5-8 le oo atu i le tumutumuga o lona tulaga faatupu. A o le tau faai'ui'u ai o lana nofoaiga ma faaauau lona nofoalii (2 Sam 9-20), ua toe faamatalaina ai e le 2 Sam 21-24 lona tulaga faatupu. E manatu lenei pepa, o le 2 Sam 21-24 o ni faasaoga (deconstruction) o le 2 Sam 5-8

faacacau itulau e 6

Fesoasoani mai nisi o Faalapotopotoga ma Aulotu i Fafu mo Mafatiaga i le Sunami

Susuga Laki Slade F.T., o le a sii mai le teugatupe autu a le Ekalesia.)

Matagaluega a San Francisco (EFKAS) US\$5000, poo le tusa lea o le \$12,000T.

Uniting Church of Australia/Unitingworld - \$157,639.73. - (mo le multi-purpose hall a Poutasi).

Aufaigaluega i Masterton, Ueligitone - \$2000.

EFKS Masterton Youth, Susuga Meki Lauvi - \$1000.

Ranui Presbyterian Parish, Rev. Pelu Tuai - \$12,000.

Presbyterian Church Toowomba, Pirisipeni, Ausetalia - \$15,550.

FGFL/CWM Global, Initial Crisis Assistance - \$54,813.75.

Matagaluega a Sini, Susuga Peleti Toailoa F.T. - \$10,000.

Christian World Service, Niu Sila - (Saleapaga multi-purpose hall) -

\$51,772.25.

National Council of Churches, Ausetalia - (Saleapaga multi-purpose hall) - \$43,636.06.

Brimbank Anglican Church/Anglicord - (Saleapaga multi-purpose hall) - \$43,522.

Presbyterian Church of Aotearoa NZ (PCANZ) - \$32,179.80.

Aofai o tupe ua iai, toese pili a le faletupe - \$454,074.54.

O isi tupe ua taunuu mai ma ua tuuina atu i le faletupe:

NZD\$4500=WST7923.

Hong Kong Council - US\$8300.

Matagaluega Aukilani i Matu - WST\$25,000.

Ma o le faaogaina lenei o tupe fesoasoani ua foa'i mai:

Pili/sikolasipi mo le fanau aoga - \$30,000.

Hall a Poutasi - \$158,000.

Hall a Saleapaga - \$148,000.

Hall a Satitoo - \$100,000.

Hall a Apai - \$100,000.

Tau o galuega ua amata - \$536,000.

Ua faamaonia mai foi e le Uniting Church a Ausetalia o le a latou faatupeina mai le multi-purpose hall a Ulutogia, ma ua tuuina mai le AUS\$72,000 (pe tusa lea ma le WST\$160,000).

E \$160,000 le tau o le multi-purpose hall a Satalo ua tuuina atu i faalapotopotoga i fafo. Ua faamaonia mai se vaega o le tau atoa.

Ua ofoina mai foi e le Maohi Protest Church o Tahiti se fesoasoani, ae lei mautinoa pe fia se aofai.

O loo ua talosagaina foi e le tatou Ofisa Tutotonu ni fesoasoani mo falesa ma maota na faaleagaina e le Sunami: EFKS Satalo; EFKS Letogo; EFKS Vavau.

Mafutaga Faafouina a Faifeau ma Aoao Tausinuu
24-28 Aokuso 2009
Suesuega i le Feagaiga Tuai
O LE A LE TULAGA FAATUPU O TAVITA?

ina ia faapaleni ai le tulaga faatupu o Tavita.

O LE FAASAOGA O LE TULAGA FAATUPU O TAVITA

I le faamatalaga faalua o le tulaga faatupu o Tavita i le 2 Sam 21-24, e ono foi ni vaega o loo faatulaga mai faa-ekisi (chiastic):

- A - O le faaumatia o le fanau a Saulo (2 Sam 21:1-14)
- E - O le lisi muamua: o toa e toafa (2 Sam 21:15-22)
- X - O le pese faafetai muamua a Tavita (2 Sam 22:1-51)
- X' - O le pese lona lua (2 Sam 23:1-7)
- E' - O le lisi lona lua: o toa e toatolu ma le tolusefulu (2 Sam 23:8-39)
- A' - O le faitauina o le nuu ma le faamasinoga a le Atua (2 Sam 24:1-25)

A O le faaumatia o le fanau a Saulo (2 Sam 21:1-14)

O le vaega lea o le tusi o loo faamatalaina ai le fasiotia e Tavita o le fanau e toafitu a Saulo. Na mafua ona ua augani tagata Kipeona ia Tavita, ina ia faia se togioala mo i latou, ona o le fasiotia o tagata Kipeona e Saulo. I le amataga lava ia o le tala, o loo faamatalaina ai le oge i tausaga e tolu i le nofoaiga a Tavita, lea na fesiligia ai e Tavita le Atua.

O le tali a le Atua, "*ona o Saulo ma lona aiga ua totolima, ina ua na fasiotia tagata o Kipeona.*" O lona uiga, e foliga mai o le mafuaaga o le oge, ona ua fasiotia e Saulo tagata Kipeona. Ua augani atu foi tagata Kipeona ia tauia le agasala a Saulo e ala i le fasiotia o le fanau a Saulo. Ona tuuina lea e Tavita o le fanau a Saulo, "*i lima o tagata Kipeona, ona latou faatautauina lea o i latou i le mauga i luma o le Alii*" (f.9).

Ae peitai, o le faafitauli matuia, e matua leai ni faamauga o se fasiotia e Saulo o tagata Kipeona. Pe aisea lava ua faamauina ai i le tala, sa fasiotia e Saulo tagata Kipeona, ae leai ni faamauga i le tala faasolopito o Isaraelu? Ona o le leai o ni faamauga o lea mea, e mafai ai foi ona tatou vaai ma faitau ma le masalosalo i lenei tala. E faatupu manatu foi, atonu o se faiga potu lea a Tavita e

aveesea ai le fanau a Saulo, o le sa fai ma tupu, ma le faalavelave i lana nofoaiga. Afai o le tulaga lea, ua atagia ai lava le tulaga mauualo ma le faaletonu o lona tulai mai ma lona tulaga faatupu.

E Lisi muamua: o toa e toafa (2 Sam 21:15-22)

O le lisi muamua lenei, o loo faamatalaina ai toa e toafa o Isaraelu na fasiotia toa o Filisitia. I le ogatotonu o le lisi, o loo matua faaeaea ai nei toa ia Tavita lo latou tupu. Fai mai "*.....E te le toe maliu atu ma i matou i le taua, ina nei tineia le malamalama o Isaraelu*" (f.17). O se manumanuga ina nei maumau le soifua o le tupu, o le na tofia e le Atua. E o tutusa lea faamatalaga ma le 2 Sam 18:3, "*E te le maliu atu lava,.....a o lenei ua tusa oe ma le sefulu afe o i matou.*" O se faailoga o le maualuga o le tulaga faatupu o Tavita, o lona tagata taualoa, e mafaia ona suia uma ai se numera toatele o tagata. Ua faitau sefulu afe le aofai o fitafita ua fia feoti mo lo latou tupu.

Ae peitai, e lua ni faasaoga ua matauina i le manatu lea. Muamua, fai mai le f.15, "*.....Ona vaivai ai lea o Tavita.*" E foliga mai ua leai se malosi o le tupu, ae ua faamoemoe i ana auauna ma ana toa. A o se auala potu lea a le tusitala e tuu faafeagai ma faatusatusa ai le malosi o Tavita. O le taua lena o le sosoo mai o le fuaiupu e 15 o loo vaivai ai, ma le fuaiupu e 17, lea o loo faaeaina ai Tavita e ana auauna.

Lua, o le fasiotia o toa o Filisitia, e manino le leai lava o se galuega na faia e Tavita. E oo lava i le faatoilaloina o Koliata i le f.19, o Elena le Peteleema na ia fasiotia Koliata.

A faitau manino la i nei lisi, o Tavita o le tupu matautia, o ia o le '*malamalama o Isaraelu,*' a o lea e manino i le vaega lenei, e leai lava ma sana galuega na faia e faatoilaloina ai Koliata ma isi toa o Filisitia. Ma o le faasaoga lea o loo taumafai iai, e faapaleni le tulaga faatupu o Tavita. E tusa lava pe iai, pe leai foi se '*malamalama,*' o loo faatusa ia Tavita, e mafai lava ona tau ia toa o Isaraelu, ma manumalo ia Filisitia.

X O le pese faafetai muamua a Tavita (2 Sam 22:1-51)

E tolu vaega taua o loo vaevaeina ai lenei pese umi. O le vaega muamua o le pese, o le laveaiina (ff. 2-20), o loo lagiina ai le aao laveai o le Atua ia te ia. O lana tautinoga i le fuaiupu e 7, "*ona ou valaau atu ai lea i le Alii, na ou valaau lava i lo'u Atua, na faafofoga mai foi o ia i lo'u leo ai lona malumahu, o la'u alaga foi na oo i ona fofoga.*" O le faailoga lea, na matua faatagisia e Tavita se laveaiina mai le Atua. O lana alaga foi na lagona e le Atua ma laveai ia te ia.

O le vaega lona lua, e ogatotonu iai le pese, i le tali mai o le Atua i le tagata amiotonu ma le tagata amio leaga (ff.21-28). Fai mai, "*Ua tauia mai au e le Alii e tusa ma la'u amiotonu, ua tauia mai e ia ia te au e tusa ma o'u lima mama....Aua ua ou tausia ala o le Alii, ma ou le lafoai faalemata'u i lo'u Atua.....na ou le tuueseina foi ana tulafono ia te au. Na ou amiotonu i ona luma, na ou tofia a'u i la'u agasala. O lenei, ua tauia mai a'u e le Alii e tusa ma la'u amiotonu, e tusa foi ma o'u lima mama i ona lava luma.... e te amiotonu oe i le ua amiotonu.*" O lona uiga, o le ogatotonu o le pese, o loo faailoa mai ai o le laveaiina ma le manumalo, o le tau o le amiotonu a Tavita mai le Atua. O le manatu maualuga lea, o le tupu o Tavita ua matua sili lana amiotonu.

Ae peitai, e iai lava nai faasaoga o le amiotonu lea, o loo manino iai tagata Isaraelu i lo latou tupu o Tavita. Fai mai o lana amiotonu na foai ia te ia o le '*malamalama o Isaraelu*' (2 Sam 21:17). Ae ese foi le mea e manatua ai lea malamalama. I le 1 Tupu 15:4-5, "*ua foaiina e le Alii lona Atua ia te ia o le malamalama i Ierusalem,.....Aua na faia e Tavita o mea e tusa i luma o le Alii, na ia le liliu ese i se mea e tasi na ia fetalai mai ai ia te ia, i aso uma lava o lona ola, ua na o le mea na ia faia ia Uria le sa Heti.*"

O lea ua manino ai, e ui lava o Tavita o le tagata amiotonu, ae ua manino foi le matilatila ma le matuia o le agasala na ia faia ia Uria. O le agasala ua manino uma iai tagata Isaraelu. Ua fesiligia ai foi pe onomea le ave iai o le faaeaea i le maualuga o lana amiotonu, e pei ona faamatalaina i le vaega lenei o le pese. O le uiga o le manatu, o Tavita lava ia, o ia o le tupu, ae peitai, e le alaga tatau iai se amiotonu ma lima mama.

O lona laveaiina ma lona manumalo, e le ona o lona malosi ma lona tulaga faatupu, ae ona o le faamaoni o le Atua. O le faasaoga foi lea e faamanino atili ai,

faacua itulau e sosoo ai

Mafutaga Faafouina a Faifeau ma Aoao Tausinuu

24-28 Aokuso 2009

Suesuega i le Feagaiga Tuai

O LE A LE TULAGA FAATUPU O TAVITA?

e tutusa lelei le tupu ma soo se tagata lautele o Isaraelu. O i latou uma e tulaga tutusa i le foafoaga a le Atua, e alaga tataua ai ona faalogo ma usitai. O le tupu lava ia e leai se mea na te mafaia, e leai foi sona tau e maua mai i sona tulaga faatupu ma sana amiotonu. Ua na o le Atua lava na te laveaiina ma maua ai le manumalo. O le faasaoga lea o loo faamanino mai e le pese. E le o se faaeaea ma se faamanatuina o le tulaga faatupu o Tavita, ae ia faailoa mai ai le tulaga e tataua ona iai le tupu, e manaomia tonu e le Atua. O le Atua e faafofoga ma faatino mea uma i lana pule fai toatasi.

O le vaega lona tolu o le pese, o le manumalo (ff.29-51). Lea e faamatalaina ai le manumalo o Tavita, e mafua mai i lona potu ma lona malosia. I le fuaiupu 30, 38-39, 43, fai mai ".....na ou sofai ai le au.....na ou osopuna ai i le pa.....na ou tuliloa ai i e fai a'u mo latou fili, ma ou fasiotia i latou,.....ua ou tineia i latou, ma ou fasia i latou,.....ona ou nutinini lea ia te i latou,.....na ou tu'ipala ia te i latou,.....na ou solia i latou." O nei mau faaupuga uma a Tavita, e foliga mai ai ua ia mafaia mea uma i lona malosia, e aunoa ma sona saili i le Atua. Ae peitai, na toe faaiu lava lana pese i le vivii ma le faafetai i le Atua, o la o lona olataga, ua mafai ai ona ia maua le ola ma le malosia (ff.47-51).

X' O le pese lona lua a Tavita (2 Sam 23:1-7)

O le pese lona lua o loo faamatalaina ai le faauuina ma le faaeaea o le tupu. E mai le Atua le faaeaea ma le tulaga maua, e tataua ma onomea mo le tulaga faatupu. I le faaiuga o le f.5, o loo faapea ai Tavita, ".....a ua na osi se feagaiga e faavavau ma a'u, o loo saamia i mea uma lava, ma ua tausia...." O le feagaiga e faavavau, e maua lava lona tulaga. O loo faamauiina foi i le 2 Sam 7:14-16, "E fai a'u mona tama, e fai foi o ia mo'u atalii, a agasala o ia ou te aoai atu ia te ia ma le sasa a tagata, ma ta a tagata, ae le aveeseina lo'u alofa ia te ia, pei ona ou aveeseina Saulo, o le na ou aveeseina o'u luma. Ou te faatumauiina lou aiga ma lou malo e faavavau i ou luma, e mausali lou nofoalii e faavavau." E manino lava o le feagaiga e faavavau e leai ni ona aiaiga, ma e tumau e faavavau.

O le pule fai toatasi lea a le Atua e tumau ai le feagaiga, ma ua faaeaea ai Tavita.

Ae peitai, i le ogatotonu o le pese, fai mai, ".....O le ua pule i tagata ia faia ma le tonu, ia pule ma le matau i le Atua e pei o le malamalama o le taeao ina ua alu ae le la, o le taeao e leai ni ao uli, e pei o le vao mu'a mai le eleele i le pupula mai mai le timuga." (ff.3-4). O le tupu, o ia o le puna o le ola. O lona uiga, e le soo se ituaiga tupu lava, e avefa ma se puna o le ola, ae ua na o le tupu, e pule o ia ma le 'tonu'.

E tutusa le faauigaina o le f.3 ma le lapataiga a Samuelu ia Isaraelu i le 1 Sam 12:14-15, 25, ".....Afai tou te matatau i le Alii, ma aucauna ia te ia, ma faalogo i lona siufofoga, ae le fouvale outou i le afioga a le Alii, ona mulimuli ai lea i le Alii lo outou Atua, o outou, atoa ma lo outou tupu o loo pule ia te outou. Ae afai tou te fai amio leaga pea, e famo outou atoa ma lo outou tupu." E faatolu lava ona faapea Samuelu, 'o outou ma lo outou tupu,' o lona uiga, e tulaga tutusa lelei lava le tupu ma soo se tagata Isaraelu. E le sili atu foi le tupu i le Tulafono. O lona uiga, e faalagolago le feagaiga e faavavau i le amiotonu a le tupu.

E' O le lisi lona lua: o toa e toatolu ma le tolusefulu (2 Sam 23:8-39)

I le lisi o toa e toatolu ma le tolusefulu o taitai'au, e iai ni vaega e mafai ona maua mai ai nai faasaoga i le tulaga faatupu o Tavita. Muamua, o loo faamauiina i le lisi le tele o iai toa o Isaraelu e ese mai ia Tavita. O faiga masani lava, e le lisiina ni toa o se malo, ua na o igoa lava o tupu. O le faamauiina la o le lisi o toa, o se faailoga lea e le mafai lava ona tutoatasi na o Tavita ma sona malosia faafitafita. E le mafai foi ona faatinoina na o ia, se faamanatuina o se manumalo i se taua.

Lua, i le f.9, 12, fai mai, ".....ua faia foi e le Alii le faaolataga tele i lea aso...." O lona uiga, o le manumalo na faia e le Atua, e aunoa ai lava ma se faamauiina o le igoa o Tavita. E le pei o le 2 Sam 8:6,14, o loo ta'uina ai le igoa o Tavita, fai mai, ".....Ua faasaoina Tavita e le Alii." Ia pe faapea foi e pei ona faamauiina i le 2 Sam 8:13, "Ona viia lea o le suafa o Tavita...." O nei

faamaumauga e maua lava ai le tulaga faatupu o Tavita. Ae peitai, o le lisiina o toa, ua maua lava ai le tulaga o Tavita, ona ua le faamauiina ai sona igoa.

Tolu, o le igoa Uria o loo faamauiina mulimuli i le lisi o toa. Ae fesiligia foi pe aisea ua faamulimuli ai lona igoa. Atonu e ala foi ona faamulimuli, ia fai ma faailoga, o se faamanatu ma se lapataiga, ia aua lava nei galo le agasala na faia e Tavita ia Uria. O le faamauiina foi o le igoa o Uria, e faamanatu mai ai i tagata o Ierusalem, e iai lava le isi puleaga e sili atu nai lo Tavita. Tusa lava pe lelei i le vaai a Tavita, ae leaga lava, e pei ona faamauiina i le 2 Sam 11: 25,27, ".....A ua leaga i le Alii le mea ua faia e Tavita."

Fa, i le ogatotonu o le lisi, o loo faamauiina ai le manao o Tavita e fia inu i le vai mai Peteleema (ff.13-17). O se galuega e faigata ona faatino e nai toa e toatolu, aua e ono maumau ai le ola. E maua foi le tali a Tavita ina ua maua mai le vai, ".....e le o le toto ea leni o nei tagata, na latou o toa'i i ai" e le mafai ia te ia ona imu ai...."(f.17). Ua lotu tasi uma nei toa e faataunuu le manao o Tavita, ma e le taumate le maua lava o lona tulaga faatupu i le vaai a nei toa.

Ae peitai, ua talitua lona e Tavita lo latou tautiga. O le faailoga tonu lea o le maua lava o le tulaga faatupu o Tavita, lea ua ia le taliaina le vai na manao iai. Ai ona o le vaai maua lava i le tulaga o nei toa. Sa nofo olo faatasi foi Tavita ma nei toa, ae lei tau o ia i se taua. O lona uiga, e lei manumalo foi Tavita i se taua. O le aotelega o le manatu, o lona malosia ma lona mamalu, e lei mafua mai i sona malosia ma sona tulaga faatupu, ae mafua mai i le galulue faatasi o toa o loo faamauiina i le lisi.

A' O le faitauina o le nuu ma le faamasinoga a le Atua (2 Sam 24:1-25)

O le vaega lea o loo faamatalaina ai le faitauga o le nuu ma le faamasinoina o Tavita, e iai ni vaega e atagia ai le leai o se malosia o Tavita. I le f.1, fetalai le Atua, "alu ia ina faitau ia Isaraelu ma luta." E ui lava ina maua lava lona pule i lona tulaga faatupu, ae pulea mai lava e le Atua. O le pule faatupu foi lea a Tavita na faalala foi ia Ioapo (ff.3-9), ae le soalaupule e pei ona masani ai ituaiga uma o Isaraelu.

O lana ta'utinoga i le f.10, "ua ou matua agasala lava i le mea ua ou faia." o le faailoga ua ia le toe manatu i lona faaauau itulau e sosoo ai

O E MALILIU...

Taupá'u Fetalaiga Kirisome

4 Mati 1941 - 25 Novema 2009



O ona matua o Arielu Leauanae Kirisome ma Palolo Faamoá Tagaloasa Tofilau.

Na soifua mai i le aso 4 Mati 1941, ae malii i le aso 25 Novema 2009. O ia o le A'oa'o Fesoasoani i le Ekalesia i Alafua, ma Apai i Manono.

O ona uiga filemu ma le le gaoia, ma le loto maualalo, e le faagaloina.

O la Iesu, 'Amuia e agamalu, ma faatupuina le filemu, aua e taua i latou o atalii o le Atua.

Na faaipoipo ia Niusila Le Mamea Matatumua, ma e toalua o la alo. O fanau a la fanau e toalima. O le tele o lona soifuaga sa galue ai i le Matagaluega o Leoleo. Sa ia taitaia le vaega susesue a leoleo i fualaau faasaina. Na avea o ia ma taitai leoleo sinia. E ritaea Taupau ma le Matagaluega o Leoleo ma Falepuipui ua fai o ia ma Sui Komesina. O se tamalii e ese le faamaoni, ma le toamalie.

E toaga i lotu, ma fiafia e faamaopopo mea o le lotu. E muamua mai lava o ia, ma ana grandchildren i le tele o lotu i Aso Sa. E faamalosi, e faatino lona tofi a'oa'o fesoasoani, tiga ona le malosi. Sa taoto i lona fatu i Niu Sila e lima ona bypass. E fiafia e susesue i le Tusi Faitau Aso faa-papalagi o lea tausaga

ma lea tausaga: Light for Our Path.

E lei faataotolia, a o le uma mai o lana koloni savali i lona taeao, 25 Novema 2009, na oso faafuasei ai lona fatu, ma malii ai loa.

O ona toe sauniga sa taitai e le Pulega. O au sa taitai, o Peteru Sciuli F.S. sa faaulufaleina lona sa. O Esekia Pencueta sa faitauina le Tusi Paia. O molimau (1) Tuilaepa Niu Sila lona faletua; (2) Faimanifo Meleane Aua, lona tuafafine; (3) Toleafoa Faafisi Minisita o Leoleo ma Falepuipui (4) Iona Paniani, faifeau Apai Manono. Tatalo Apisaloma T. Aiono; Lauga Larry Tofaeono. O au sa faaopopo ma molimau. Ona faaii ai lea o ona toe sauniga i lona nofoaga mau i lona aiga i Alafua.

Amuia lea auauna, aua e maua mai e lona Matai o loo faapea ona fai.

Tavita Anesone F.T.

faacaucau itulau e 19

Mafutaga Faafouina a Faifeau ma Aoa'o Tausinuu

24-28 Aokuso 2009

Suesuega i le Feagaiga Tuai

O LE A LE TULAGA FAATUPU O TAVITA?

tulaga ma sona mamalu faatupu. O le filifiliga foi na ave iai e le Atua poo le a se faasalaga (ff 11-13), e iloa ai le leai lava sona malosi. Ua matua leai lava sana faitalia i se isi lava filifiliga na te faia, e alo ese mai ai i le faasalaga ua tuuina mai.

O lana tautinoga i le f.14, "*...ua ou matua fememeai lava,*" o se suiga mai lana faatonuga malosi ia Ioapo, "*ia e fealuai...ma faitau le mu.*" O le faailoga lea o le faamaulalo o lona loto. O se suiga na ia iloa ai, e sili atu le alofa o le Atua, nai lo le fano i lima o tagata i se taua: "*Ia ou pau atu i aao o le Alii, aua e tele lona alofa mutimutivale, ae aua ou te pau i lima o tagata.*" Lea ua manino ai, o Tavita o se tagata ua faagalologo i lona tulaga faatupu, ae avea o ia ma atalii o le feagaiga.

O le faatinoga a le agelu faaosala (f.16), ia taofi ai lona lima, na taofi i le faatonuga a le Atua, e aunoa lava ma se aia iai o Tavita. Ua atagia ai le vaivai o le tupu, ae manino ai le pule fai toatasi a le Atua. O le vaivai foi lea o Tavita na salamo ai (f.17) ma manatu ai loa i le saogalemua o lona nuu. Ua ia faia foi le fata faitaulaga, ma augani atu i le Atua

ma lona nuu, ona faafofoga lea o le Atua i lana tatalo (ff. 18-25).

O lona uiga, i le faaiuga o talaaga o Tavita, lea na ia faatoa iloa manino ai, lona tulaga moni lava faatupu, e tatau ona iai. O ia o se auauna e ao ona usitai i lona matai, e pei o se tamaititi o loo augani mo se fesoasoani. Ua na iloa ai foi lona va feagai ma le Atua, o ia o se tagata gaogao'i'i faatasi ma lona nuu. E ao pea ona lagonaina lona faatauvaa, e ao foi ona lagonaina lona valaauina mai le Atua, ma lana feagaiga e faavavau.

UPU FAAIU

E eseese taumafaiga a le au susesue e faafealofani ai faamatalaga i le tulaga faatupu o Tavita i le 2 Sam 5-8 ma le 2 Sam 21-24. Ua faaaogaina ai metotia masani, o le faauigaina o letulaga faatupu o Tavita i lona faalotoifale (historical method). Ua faaaogaina foi metotia faaneionapo, o le faauigaina o le tulaga faatupu o Tavita i le siosiomaga o le tagata lava ia, faapei o itupa o tina, o e matitiva, ma e taotaomia, ae faapea foi soo se tulaga o iai se sosaiete o lona tagata lava ia (contextual reading). E faalagolago

lava la le tulaga faatupu o Tavita i le metotia o loo faaaogaina, e mafai ona faauigaina ai ma malamalama ai. E pule le faigaluega ia i lana metotia, e fua iai lana faauigaina o le tulaga faatupu o Tavita. Ina ia mafai ona aumai ai ni feau taua mo le galuega faa-faifeau ma le Tala Lelei. A o le metotia ma se taumafaiga vaivai o lenei pepa, o le faauigaina lea o le tulaga faatupu o Tavita, i uiga tuu sa''o o faamatalaga (literary method).

E leai se faamoemoe o lenei pepa e faanefu ni tulaga faatupu o Tavita. Ae o nai susesuega faatupu manatu, o le mea moni lava ia, e le tasi sona tulaga faatupu. Faapei o nai faataitaiga ia: E iai le Tavita manumalo, o le Tavita toilalo, o le Tavita faamaulaluga, o le Tavita malosi, o le Tavita vaivai, o le Tavita agasala, o le Tavita salamo, ma le Tavita loto maualalo.

Fesili e fetufaa'i ai

- (a) Aisea ua fete'ena'i ai le faamatalaga o le tulaga faatupu o Tavita?
- (e) Ae faapefea ona faamataupu silisili nei fete'ena'iga?

Saunia e le Matagaluega o le Feagaiga Tuai:

Peni Leota
Makesi Neemia
Arthur Wulf
Seilala Luamanuvae

O E MALILIU...

Fuamatu Atilua Fuamatu

18 Tesema 1939 - 26 Tesema 2009



O le Susuga i le A'oa'o Fesoasoani na soifua mai ia Tesema 18, 1939, ae tuumalo ia Tesema 26 2009. Na faaipoipo atu ia Eti Lona Fuamatu ia Aokuso 22

Tafesilafa'i Ipinu Filipo

5 Ianuari 1953 - 8 Setema 2009



O le alii tiakono Falefa, Anoamaa. Na soifua mai i le aso 5 o Ianuari, 1953. Na faaipoipo ia Asiasiga Leuta i le tausaga

1963, ma avea ma tiakono i le 1989 - ae faaee iai le tofi aoaao fesoasoani i le 1991.

O se tama o le nuu, ma o se faufautua lelei foi e le gata i le nuu a o le malo, e pei ona sa umia ai tofi o komiti faufautua o matagaluega a le malo mo tausaga e tele. Sa saunia lona molimau e le faletua, ma le fanau, faatasi ma le molimau a le Susuga a le Tiakono Toeaina, Tuisugaletaua S. Aveau, e uiga i lona soifuaga i le nuu ma le malo. Sa taua lana tofa ma le utaga loloto ma le potu, o mea ia o le a manatua ai pea o ia e lona nuu ma lana Ekalesia.

O se tama tautua lotu, ma le toaga i sauniga lotu. O se tama e saunia lelei i ana lauga, ma ana apoapoiga e tele mo le nuu. O le molimau faaleagaga sa ou saunia lea, faatasi ma le upu faamafanafana. O le Susuga Lotu Uele

1979. Na avea i la'ua ma ti'akono ia Setema 1984. O Tafesilafa'i, o se tama galue lelei, galue malosi ma faamaoni i ona tiute faale-Ekalesia uma. O se sui a aufaipese mo tausaga e tele se'ia oo ina valaau mai lona matai. Tele foi tausaga o Komiti o le Alofa, Komiti Taulaga Samoa, Komiti Taulaga Nuuese faapea le Taulaga Au Taumafai. E maluu foi le alii tiakono o avea pea ma taitai o le Au Talavou. E loto mauualalo, filemu ma loto alofa. E ola finau mo le lelei o lona aiga ma si ana fanau aemaise le Ekalesia a Keriso. O lona aiga e tausia le faifeau i aso uma. O se gasegase faafuasei na maluu ai i

sa faaulufaleina lona sa i le malumalu. O Setu Samitioata sa faitauina le Afioga Paia a le Alii, a o Pualenuu Tagataese sa saunia talosaga. O le Susuga Peteru Tone (FT) sa taitai, ma saunia foi le molimau faaopoopo.

O a Paulo ia Filipi 4:19: "A o lo'u Atua, e faaatoa e ia ia te outou mea uma e matitiva ai outou e tusa ma le faulai o lona viiga, ia Keriso Iesu. Ia i le Atua lo tatou Tama le viiga e faavavau faavavau lava. Amene.

Ia faamafanafana atili oe le tina Eti ma le fanau, ona o le toesea o le tama o le aiga. Faafetai Fuamatu mo le fesoasoani tele i le ma galuega.

Ia manuia lau malaga.

Iupeli Ieremia F.S.

Motootua i le aso 8 Setema 2009, ae falelauasi i le aso 19 o Setema lava. O ona toe sauniga sa lauga Vaigalo Maua F.S. O Tafa'i Galumalemana F.S. na tatalo, o le A'oa'o Malua o Semikueva Malala sa faitauina le Tusi Paia. O Alataua Sootaga F.S. na faaulufaleina lona sa. O au lava sa taitai ma molimauina lona soifua galue ma faaii lona toe sauniga i lona oliolisaga tumau.

Faafetai Tafesilafa'i, amuia oe e valaau mai lou Matai o e galue pea. Manuia lau malaga. Faafetai.

- Faataulooa Maualaivao F.T.

Tusi mai le Ekalesia EFKS i Hampton Park

Tulouna ia oe Samoa o le atunuu tofi, i le afua mai Malaetele na maape ai tofiga o le Motu Sa, pau mai Analega sa teu ai malo, ae valoia ai le sulua o Samoa i ave o le Tala Lelei.

Faatulou foi i paia apoapoagata o Ekalesia e fia aemaise o le lilifa o atumauga o le Tala Lelei i Minisita o le Upu ma le Sakalameta o loo faa-faleauto ae faanono manu i le Atua ina ia faaifo mai lagi manuia mo Samoa. Faatulou i le paia o Aiga, Paolo ma gafa o uo ma e masani ia Iesu Keriso o gafa e malu ai lenei Ekalesia i Hampton Park i soo se vaipanoa o le lalolagi. Tulou, Tulouna lava.

E ui lava ua mavae atu lona tausaga a o le aao mafola ma le aao agalelei e le mafai ona mavae i o matou loto, e tumau lona matagofie. Lea ua matou tapuai fiafia i le mauga o le Atua poo le Fale Tatalo mo Nuu Uma, ae fagufagu mai pea i ai matou: O ai na maua ai? O ai na faapogai ai? O ai na manuia ai?

Lau Afioga i le Taitaifono o le Fonotele EFKS ma le Laulau a Fono, Komiti a le Au Toeaina, le paia i le nofo a Toeaina, Afioga i Tiakono Toeaina, le mamalu mauualuga i Ao o Faalupega ma faletua i Ekalesia e fia. Ua iu manuia ona o lau tou tatalo, na maua ona o lou tou aao foai e ala i le toga paia ma tupe mamala. Ua outou aitaumalele ona o lou tou silasila i le Atua ma lana Tala Lelei ina ia tupu ma ola i lenei vaega o le lalolagi.

Ua le mafai e vasa e fia ma fita o le ala ona taofia lou tou faamalo'ulo'u mai ona o le faatalauala atu a lenei Ekalesia to'a gaogao, ua le gata la ina auautetele ai lo matou aso, ae ua maua ai e lenei Ekalesia le mafanafana ma le loto tetele ona o lou aao foai.

E momoli atu ai le faafetai tele mai taele o matou fatu ma agaga. Fai mai Levalasi ia Tuiiana Tamaalelagi, Paga lou agalelei ia te au, ua e tuu au i le lagi ua viligia ai au i le sau o le ola o le Malae o Vavau. Ua matou tapuai fiafia ma le saoloto i

lenei Fale Tatalo mo Nuu Uma ona o lau tou faaeaea ma le matamau. Faamauniina foi le agaga faafetai i le paia o Ekalesia e fia, le Matagaluega a Vitoria aemaise o la matou Pulega i Melepone i Saute. O paolo ma gafa o aiga, uo ma e masani.

O Tutuila o Atua o Atua o Tutuila. Ua logo i tino le mafanafana o le papai mai o le uso i le uso, ua ou malosi ai ua ou mauoloa i le anoanoai o oloa ua e foaiina mo lou uso vaivai. Ua oge upu o le gagana e faaleo ai le agaga faagaetia ua na o le upu lava o le faafetai ma le ea, ae faamoemoe i le Agaga o le Atua e nanea ai se upu a lenei auauna faatauvaa ma le Ekalesia.

O a mea ua aveesea ona o le Atua toe faatutumu atu e le Atua. Manuia galuega amata o lenei tausaga. FAAFETA! FAAFETA! TELE LAVA.

Le Alii e, aua lava nei iai matou le viiga ae foi atu pea le viiga i lau Afio nei ma aso uma e oo i le faavavau.

Rev. Kolia Tovio

& le Ekalesia i Hampton Park.

FAASOLOGA FONO TELE 2009
MALUA, ASO 10 - 21 ME

<u>ASO</u>	<u>TAIMI</u>	<u>KOMITI & SAUNIGA</u>	<u>NOFOAGA</u>
ASO GAFUA 10/05/10	10.00am	Komiti Faatonu	Fale Iupeli
	1.00pm	Komiti o Atiina'e	Fale Senetenari
	7.00pm	Lotu Talosaga Au Toeaina	Fale Iupeli
		<i>Ta'ita'i: Apelu Lelevaga FT (Malua).</i>	
ASO LUA 11/05/10	8.00am	Komiti Au Toeaina	Fale Iupeli
	9.00am	Komiti o A'oga	Fale Senetenari
	7.00pm	Faletua Au Tocaina	Fale o Tina
ASO LULU 12/05/10	8.00am	Komiti Faamisionare	Fale Mafutaga
	8.00am	Komiti o Feau Eseese	Fale Senetenari
	9.00am	Komiti Au Taumafai	Fale Mafutaga
	2.00pm	TPT: Tautua Puapuaga o Tagata	Fale o Tina
	7.00pm	Komiti o Tupe	Fale Mafutaga
		Lotu Au Taumafai	Fale Iupeli
		<i>Ta'ita'i: Roma Enosa FS (Apia i Sasa'e)</i>	
ASO TOFI 13/05/10	8.00am	Komiti o Tupe	Fale Senetenari
	9.00am	Komiti Au Leoleo	Fale Mafutaga
	2.00pm	Lotu Mafutaga Tina	Fale o Tina
	7.00pm	TPT: Teine Papauta Tuai	Fale o Tina
		Lotu o Nuu Esc	Fale Iupeli
		<i>Ta'ita'i: Maligi Evile FS (Aukilani)</i>	
ASO FARAILE 14/05/10	5.00am	Lotu Au Leoleo	Fale Iupeli
	9.00am	<i>Taitai: Lauie Lupematasila FT (Kuiniselani).</i>	
	2.00pm	Fono Mafutaga Tina	Fale o Tina
	7.00pm	Komiti o Tupe	Fale Mafutaga
		Komiti o Feau Eseese	Fale Senetenari
		Fono Malua Tuai	Fale Senetenari
ASO TOONAI 16/05/09	9.00am	SAUNIGA O LE FAAUUGA	Fale Iupeli
	<i>Taitai: Laau Ioritana Tanielu FT (Aukilani)</i>		
	<i>Faitau Tusi Paia: Tavita Taulealo FT (Manukau)</i>		
	<i>Tatalo: Popo Su'a FT (Niu Sila i Saute)</i>		
	<i>Tu'uina o A'oa'o mo le Faauuga:</i>		
	<i>Tautiaga Senara FT - (Aana)</i>		
	<i>Faaelima: Laau I. Tanielu FT (Aukilani)</i>		
	<i>Liki Tiatia FT (Amerika)</i>		
	<i>Siueva Gogo FT (Ituotane)</i>		
	<i>Isaia P. Tiatia FT (Falealili i Sasa'e)</i>		
	<i>Esekielu S. Tanielu FT (Aana)</i>		
	<i>Kerisiano Soti FT (Apia)</i>		
	2.00pm	Lotu Tupulaga	Fale Iupeli
<i>(Taitai: Faapaia Tariu FS (Faleata)</i>			
7.00pm	TUFA FAILA A USUFONO	Fale Fono	
ASO SA 17/05/09	9.00am	LOTU TAEAO/FAAMANATUGA	Fale Iupeli
	<i>(Taitai: Siueva Gogo FT (Ituotane)</i>		
	LOTU TAEAO/FAAMANATUGA		Fale o Tina
	<i>(Taitai: Aliimau Manu FT (Faasaleleaga)</i>		
	6.00pm	LOTU AFIAFI	Fale Iupeli
<i>(Taitai: Fa'au'uga Mata'utia FS (Faleata)</i>			
LOTU AFIAFI		Fale o Tina	
<i>(Taitai: Fiatepa Faa'e FS (Aukilani)</i>			

17 - 21, USUIA LE FONO TELE

ASO GAFUA 17/05/10	7.45am	Tapuaiga Amata <i>Taitai: Esekielu Situfu Tanielu FT –Taitaifono</i>
	10.00am	Pepa: <i>Kolisi i Malua</i>
	11.00am	Taualumaga o le Fono Tele.
	12.00pm	Malologa mo Taumafataga o le Aoauli.
	2.30pm	Fa'aaauau Taualumaga o le Fono.
	5.30pm	Malolo le Fono
	7.00pm	Evaevaga o le Po.
ASO LUA 18/05/10	7.45am	Tapuaiga Amata <i>Taitai: Urika Saifoloi FT (Penisione)</i>
	8.00am	Pepa: <i>Au Toeaina.</i>
	9.00am	Taualumaga o le Fono Tele.
	12.00pm	Malologa mo Taumafataga o le aoauli.
	2.30pm	Fa'aaauau Taualumaga o le Fono
	5.00pm	Malolo le Fono
	7.00pm	Pepa –
ASO LULU 19/05/10	7.45am	Tapuaiga Amata <i>Taitai: Prof. Otele S.Perelini (Pule Kolisi Malua)</i>
	8.00am	Pepa: <i>Mafutaga a Tinā.</i>
	9.00am	Taualumaga o le Fono Tele

10.00am SAUNIGA ALOAIA MO FAIFEAU PENISIONE*Taitai: Esekielu Situfu Tanielu FT - Taitaifono*

12.00pm	Malologa mo Taumafataga o le aoauli
2.30pm	Fa'aaauau taualumaga o le Fono
5.00pm	Malolo le Fono
7.00pm	Pepa:

ASO TOFI 20/05/10	7.45am	Tapuaiga Amata <i>Taitai: Samuelu Tuiai FT (Penisione)</i>
	8.00am	Pepa: <i>Tiakono.</i>
	9.00am	Amata Taualumaga o le Fono Tele
	12.00pm	Malolo mo Taumafataga o le aoauli
	2.30pm	Fa'aaauau taualumaga o le Fono
	5.00pm	Malolo le Fono
	7.00pm	Feiloaiga Au Toeaina & Aufaigaluega Faifeau.

ASO FARAILE 21/05/10	7.45am	Tapuaiga Amata <i>Taitai: Esekielu Situfu Tanielu FT –Taitaifono</i>
	8.00am	Pepa: <i>Au Talavou.</i>
	9.00am	Amata Taualumaga o le Fono Tele.

TAUALUMAGA O LE FAASOLOGA O LE FONOTELE:

- 1 Faamaonia Iugafono Fono Tele 2009.
- 2 Mau Tu'u Sa'o mai Matagaluega.
- 3 Mau Tu'u Sa'o mai Komiti Tetele e Ono a le Ekalesia:
- 5 Faamaonia Galuega a Komiti.
 - i. Komiti o Tupe
 - ii. Komiti o Feau Eseeese
 - iii. Komiti o A'oga
 - iv. Komiti o Atiinae
 - v. Komiti Faamisionare
 - vi. Komiti Au Toeaina.
- 6 Palota Sui Taitaifono.

FAILAUTUSI AOA

O E MALILIU...

Fagasa Maligi Lafaele

19 Aperila 1942 - 5 Tesema 2009



O Fagasa Maligi Lafaele, o le alii tiakono. Na soifua mai i le aso 19 Aperila 1942, ae na faamanavaina e le Atua ana galuega i le aso 5 Tesema 2009. Na faaiipoipo ia Amerika i le aso 18 Ianuari 1996 - e to'a 12 o la

alo. Na faaofia i le Ekalesia i le aso 2 Aperila 1986 ae na fai ma tiakono i le aso 30 Iulai 1986 ma galulue ai ma le tina e oo mai i le taimi na valaau ai le Atua. Na fai ma usufono tiakono e ala atu i leni aulotu i le Fono i Malua i le tausaga e 1997.

O le tagata sa naunau i lona aiga ma lana Ekalesia e ala i lona tofi tiakono. O le molimau lava foi lea a le tina ia Amerika aemaise o le Afioga ia Leniu sa fai ma sui o lona aiga. O Polisi, lonalua o le fanau e 12 na fai ma sui o le fanau e molimau i le latou mafutaga ma le tama.

Na faaautu la'u molimau i le upu a Paulo i le Timoteo, "Ua ou tau le taua lelei, ua i'u ia te a'u leni tausinioga, ua ou taofi i le faatuatua, ua teuina mo a'u le pale o le amiotonu." A valaauina Fagasa e tautu - muamua

mai lava o ia i lo se isi lava tiakono. O le aso 1 Novema 2009 o lana tautu mulimuli lea ma faamavae mai ia te a'u, ua le lava lona malosi mo le galuega o le tautu, na ou fai iai lelei, saili malosi a toe maua le malosi ona toe faaauau lea le galuega tautu. Peitai e foliga i lona faamavae ua iloa ua uma ana galuega, ua leai se isi mea o totoc.

O a'u lava na taitai i ona sauniga uma i le aso 17 Tesema 2009 i le malumalu EFKS i Lauili. O le Fesoasoani Katoliko o Ameto Ulugia na faamafanafana mo le tina ma le fanau ma aiga ma le Ekalesia ua tuua ma faaiu ai i lona oliolisaga tumau ma faamavae atu foi i le pese faatofa a le Au Kerisiano.

"Tofa tama, manuia lau malaga."

Pita Toleafoa F.S
EFKS Lauili

Faamama Te'o Peteru Hala

28 Fepuari 1944 - 9 Novema 2009



O le tina matua o Faamama na soifua mai i le aso 28 o Fepuari 1944

ae na faamanavaina e le Atua ana feau i le aso 9 Novema 2009. Na faaiipoipo ia Te'o Peteru Hala i le aso 2 Iuni 1990 ae na faaekalesiaina i le aso 1 Me 1991 ma galulue ai lava i le Ekalesia e oo mai i le taimi na valaau ai le Atua.

O se tina matua sa faigata gasegase sa faataotolia ai, ae lei avefa lea ma ala e natia ai lona naunau i mea fai a le Ekalesia, aemaise i le mafutaga a tina.

O ona toe sauniga na faia lava i le malumalu EFKS i Lauili. O au lava na taitai, o Te'o Peteru na molimau i

le la mafutaga ma le tina. O Iosua sa fai ma sui o le fanau; o Suaava sa fai ma sui o ona uso ma ona tuagane ae o le Afioga i le Sa'o Faapito ia Leniu Tofaeono Avamagalo mo lona aiga.

Na faaautu la'u molimau i upu a Paulo 2 Korinito 12:10: "...aupa a ou vaivai ona ou malosi ai lea". Na faaiu i lona oliolisaga ma o matou faatofa atu foi ia te ia i le pese faatofa a le Au Kerisiano.

Tofaina oe le tina Faamama, manuia lau malaga.

Pita Toleafoa F.S.
Lauili

Milovale Suipi Vaielua

24 Iulai 1946 - 27 Oketopa 2009



O le faletua o le faifeau EFKS, Fusi, Saoluafata. O Setema 14, 2002 na osi feagaiga ai le faifeau o Suipi Vaielua ma le faletua o Milovale ma le aulotu i Fusi, Pulega a Anoamaa. A o Oketopa 28, 2009 na valaau ai le Atua i le faletua.

O le Susuga Suipi V. ma le faletua na faauuina mai le seminare a Kanana Fou i Tutuila. O le faifeau e mai le nuu o Amanave, a o le faletua e mai Leone ma Onenoa., Tutuila.

Ua atoa le fitu tausaga o galulue i la'ua i Fusi. Faatoa foi mai i le la malologa, sa i Amerika, ae na fai o la togafiti gasegase o le fatu. Sa toe tolopo le foi mai o le malologa mo le isi masina ona o tulaga o o la siaki.

Peitai, ina ua toe foi mai ma faaauau le galuega, ae oso faafuasei le gasegase o le faletua, sii atu ai i Motootua, ma maluu ai i le po lava lea.

O se faletua e naunau i le galuega e ui ina feagai ma gasegase. Ua vaai le tupu ma le maopoopo o le galuega a le Ekalesia. Fiafia foi le aulotu e

galulue ma la'ua. Ua tofa ai nei faifeau i Fusi talu mai le 28 o o'u tausaga i leni Pulega. E tautala sa'o. E le fefe e ta'u le sese ma faasa'o tagata o lana aulotu. E faalogogata ia Fusi si o latou tina faale-Agaga.

O Novema 4, 2009 na amata ai ona uluai sauniga i le falemaliu o Sefo Pa'u, na taitai e le Susuga Vaalotu Nafoti, faifeau o le Pulega.

I le malumalu EFKS i Fusi o au le failautusi o le Pulega na taitai i le sauniga, o loo malolo le Tocaina o le Pulega - o Faataulua Maua F.T.. O Roma Enosa na aumaia i totonu lona sa. O Faatausau Onesemo F.S. na saunia le tatalo. O Tafai Galumalemana F.S. na faitau le Tusi

faaauau itulau e 14

Itulau mo Tupulaga Talavou

"Hale - Ua Faatau e le Atua Povi!"

Toetoe lava ina a toe tapunia le a'oga faafaifeau i Talasi (Dallas) i Amerika, ae e le'i umi ona faavacina. Ua leai ni tupe e fai ai. O i latou uma o loo aitalafu ai le a'oga, ua sauniuni mo le faasalalauina atu ua gau le a'oga (bankrupt) i le itula e 12 i le aoauli.

O le taeao lena na faapotopoto ai i le ofisa o le peresitene i latou uma na faavacina le a'oga, e tatalo i le Atua ina ia alofa ma fesoasoani mai. Sa iai i lea fono tatalo le alii o Hale.

Ina ua oo i lona taimi e tatalo ai, ona ia faapea ai lea: "Le Alii e, ua matou iloa ma talitonu, o povi uma i mauga e fia afe o lenei atunuu, o au povi. Ia e alofa mai ma faatau nisi povi ae auina mai mo matou le tupe e totogi ai aitalafu a le a'oga."

O le taimi lea o loo fai le fono tatalo a i latou na faatuina le a'oga, na alu

atu ai se alii fai lafu manu tui'umi i ana togiga kaupoe, ma lona pulou kaupoe, ma tu'itu'i atu i le faitotoa o le ofisa o le a'oga ma fai atu i le failautusi, "Talofa! Ua ou sau, faato'a uma lava ona ou faatauina atu a'u uta povi e lua i le nofoaga o fitafita i Foti Uefi. Ua leva ona ou taumafai e fai le feafaataua'iga lea ae le manuia lava, ae o lea faato'a manuia. O le ala lea ua ou manatu ai, e tuuina atu le tupe atoa na ou maua mai a'u povi, mo le a'oga faafaifeau. Ou te le iloa pe tou te mana'omia pe leai, ae o la'u siaki lea na maua mai i le tau o a'u povi."

Na tago atu le failautusi ma talia le siaki mai le kaupoe. Na ia mautinoa lava le tulaga faigata o loo iai le a'oga i le taimi lea, ma talosaga o loo fai e le pulega o le a'oga faafaifeau.

Na faanatinati atu le teine i le potu

o fai ai le fono tatalo, ma tu'itu'i le faitotoa. Na tatala mai le faitoto'a e Lui Sefa, o le na ia faavacina le a'oga. Na tago atu o ia ma aumai le siaki mai le teine failautusi. Ma le vaai atu i le siaki, o le tupe o loo tusia ai, o le aofa'i atoa lea o le aitalafu a le a'oga. Na ia vaai atu foi i le o loo saina i le siaki, o le igoa o se tasi o fai lafu manu iloga o le nuu.

Na tau ita Hale i le 'eu'eu atu o ia e Lui Sefa a o le la e tatalo. Ae ua tuu le tatalo ae faalogo mai i le musumusuu atu a Lui Sefa, "Hale, ua faatau e le Atua povi!" Ua ofo Hale i le vaai atu i le tupe o loo i le siaki, o le aofa'i lea o le latou aitalafu o loo iai. Ua tali mai le Atua i le latou tatalo ina ia alofa ma faatau atu nisi o ana povi o loo i luga o mauga!

Tusia e Howard Hendricks
Mai le tusi: **Stories for the Heart**
Faamatalaina e A.T.A.A.

FAIGALOTU ASO SA O TUPULAGA

14 FEP. 2010

F. Tuai: Sakaria 3: 1 - 5.

F. Fou: Fa'alaliga 3: 1 - 6.

O LE LAUGA

Matua: Sakaria 3: 3 - 4, "Ua ofu losua i ofu eleelea; ua tu foi o ia i luma o le agelu. Ua ia tali atu, ma fetalai atu i e na tutu mai i ona luma, o loo faapea, Ave ese ia o ofu eleelea ua ofu ai o ia. Ua ia fetalai atu foi ia te ia, Faauta, ua ou aveesea au amioletonu i ou luga; ou te faaofu foi ia te oe i le ofu matagofie."

Manatu Autu:

FAA'DFUINA I LE MAMALU MA LE MATAGOFIE
(o le vaiaso)

Manatu Autu: PA'IA

(o le Aso Sa)

Manatu Autu o le Lauga:

FAA'DFUINA I LE MAMALU MA LE MATAGOFIE, IA PAIA MO LE ATUA.

Faatomuaga:

O le faa'ofu, ua tulaga ese ai le tagata mai isi

mea ola na faia - au'ua na o le tagata ua faia i ai ele Atua lea galuega faasili, o le galuega faapoopo o Lana foafoaga. E fai le tagata, toe fai ona laei. Ona o le Atua lava ia, e faasilisili le tagata na fai i lona faatusa paia; na te alofa faamaoni i ai.

O le tala i le pa'u o le ulua'i tagata i le amataga, o loo ta'ua ai ma le ulua'i taimi na faa'ofuina ai o ia. Ina ua lē usita'i Atamu ma Eva, ma la'ua 'ai le laau e iloa ai le lelei ma le leaga, na pupula ai o la'ua mata. Na la faato'a iloa ai o i la'ua o loo lē lavalava. Tuatua'iga ia o le agasala, ua ta'u leaga fua mea mamā na fai e le Atua; ua iloa le eseese o mea leaga mai le lelei, ua iloa masiasi, ua iloa fefe, ua iloa le matagā i luma o le Atua.

Ua leai sona matagofie, ua te'a le mamalu, ua inosia ma tuulafaiina, ua lē mafai ona toe aveeseina le luma, le malai, ma le faafanoga o lona oti faavavau. Na la fatu lau o le mati ua fai mo la'ua titi. O le taumafaiaga a le tagata e teuteu o ia, ina ia agavaa e tu atu i luma o le Atua paia ma silisili ese. Ae talofa e, e le'i mafai. Seanoa le alofa o le Atua; mulimuli ane ona faia lea e le Atua o ofu pa'u ma faa'ofu ai o i la'ua.

O se mea matuitui tele lenei mo le Atua, au'ua e tatau ona muamua fasi le manu na la fai. Ua la silasila a o sisina ifo lona toto, ua la faafotogaina le manogi o le taulaga osi i lona tino; mulimuli

ane ona la faia lea o ofu i lona pa'u ma faa'ofu ai le ulua'i tagata. Mai lava i lenei amataga, na fofola ai le fala, o le va nonofo ai o le tagata ma le Atua. E a le tagata e fai le agasala ma faaeleelea i ana amioletonu, ae a le Atua e faamamā, e faamagalō, e faaola mai lona oti.

Feagaiga Tuai:

O le fa'alaliga na iloa e le perofeta o Sakaria, o le faa'ofuina e le Atua o losua le ositaulaga sili. O totonu o lotoā o le alioaga paia na tula'i atu ai losua ma ona ofu eleelea i luma o le Atua. O le taimi foi lea o loo tu ai ma Satani i tafatafa o losua, e tete'e ia te ia. Na fetalai le Alii, ia ave ese ofu eleelea o loo ofu ai losua. Ua ia fetalai atu foi, "Faauta, ua ou aveesea au amioletonu i ou luga; ou te faaofu foi ia te oe i le ofu matagofie".

Se a le uiga o lenei fa'alaliga?

Ua tuana'i le faalavelave mata'utia na tafea ai Isaraelu; o lenei ua toe a'e mai, ua faasaga ane e fai se amataga fou. Ua toe tau amata le fausia o aiga ma nuu, o upu fai o le malo, ae maise le tapuaiga a lutaia. O losua ua tofia i le faiva o le ositaulaga sili, e ati a'e le soifua faaleagaga o le nuu, e toe faatulaga lelei le tapuaiga, ma faamalosi tagata ia ola matata'u i le Atua.

Lea la ua tula'i atu losua i luma o le Atua, e tula'i atu e avauna ma galue. A o lea foi e tu atu

faaauau itulau e 15

Ua Mautu le Fanua o le Ekalesia i Lano

“O le ‘a tafa’imaa ia le tamalooa na liu fatu i le Alataua, aua le afio o le Atua Silisiliese, le ua faavae ai Samoa, o le Fa’aa o le Ekalesia Faapotopotoga Kerisiano Samoa.

Ua pa’ia Fogalematofa le malae o tua o Talalupelele.

Ua pa’ia atili aua o le malae lea ua foai motu atu e Faalavane mo le Atua ma lana galuega paia.”

O folasaga amata ia a le Tofa Mulitalo Sealimailietoa Vaiotu Siafausa Vui, i le aso na faapaiaina ai le maota o le latou aulotu i Lano.

Ona faasolo ai lava lea o le tala o le galuega, e pei ona lolomiina atu i lalo nisi vaega.

Ua 180 tausaga o le Ekalesia i Samoa, a o le uluai taimi lenei ua mautu ma aloa’ia ai faale-tulafono le nofoaga o le lotu LMS/EFKS i Lano. E le o iai se faifeau, a o loo tausia e le A’oa’o Fesoasoani o Lefono Pii ma Kalameli Talimao.

O lona lima lenei o nofoaga o fetulia’i iai le faifeau EFKS i Lano. O le malae i Talalupelele o loo iloga ai namu o le uluai falesa. O le faifeau o Liuvao F.T. o loo lagomau i lalo o le pulelaa o le falesa tuai. Na fe’ese’esea’i ai matai ona ua soloa’i ane matai e ese a latou tapuaiga i le suafa e faasino iai lea fasi fanua.

Ona ofo mai lea e Vui Nafouaina Talitu le fanua lea o loo iai nei le falesa, lea o loo lagomau ai le Susuga Euta F.T. O le nofoaga i Misamisa na sii iai le faifeau ae na mulimuli ane ua toe fe’ese’esea’i ai foi matai. Sa nofoia foi le fanua o Lotolano ae toe fe’ese’esea’i ai foi matai. Ona toe sii ai lea i le Vaiolefee i Moanaloo i se fasi eleele e tolu futu mai le alatele o le malo. Sa faamaonia e le Ofisa Fuafanua le fanuatanu. Sa tanu loa le fanua i le ta’ita’iga a tama matutua o Vui Nafouaina Faasalafa, Vui Seinafolava Lavea Levi, Malaeculu Torise, Mulitalo Pati, Faalavane Sosene, Vui Nafouaina Ola ma isi.

Sa fesoasoani mai foi le faifeau o Alaovae Alaovae F.T. ma Elisapeta, ma le aulotu mai Vaitoomuli, Palauli, i le tanuina o le fanua. Na tologi le loli a le Blue Bird e le Tofa Mulitalo Siafausa mo vaiaaso e tolu e fesoasoani i le tanuina o le fanua. Sa lagomau ai le faifeau o Peni peitai sa toe liutofaga i lona aiga. Na maluu foi le faifeau o Iosefa F.S. e lei teuina ai a o loo lagomau i lona aiga i

Vaitele Fou.

Atonu o iinei na u’una’iina ai Faalavane Sosene ma le aiga mo lenei foa’i. O se foai taua lea mo le Atua ma lana galuega.

O le oo mai o le faifeau o Don Fruean F.S. sa gasegase ai foi i Vaiolefee, ona faatele’a’i ai loa lea o le leitiofoni a le aulotu i le 2003 ma maua ai le \$11,000 ma faia ai loa le maota mo le faifeau i Matofa nei. O le tau o lena galuega e \$19,800 i le 2003. A o lea ua toe tala’ese. Sa maua a’e ma toe faitauina ai le pepa o e na faia lena fale i le 2003.

O se sailiga tupe i Niu Sila na foi mai ia Novema 2009 ma le tupe e NZ\$30,857. O le tupe lena na amata ai loa ona fuafua le fale o le faifeau.

O le Aso Toonai 29 Novema 2009 na amata ai le faavae o le maota o le faifeau. Na talosagaina foi se \$25,000 mai le Toomaga a le Ekalesia mo le fale o le aulotu. Na pei o se tala leo malie le oo mai o le Afioga Vui Nafouaina Talitu Toeutu Faaleava ina ua maua lona faailoga o le ‘Doctor’ mai Havard University, ma foai mai le \$5,000. O le tupe lena na amata ai loa le galuega o le tanuina o le fanua.

Sa faia nei galuega ma fuafuaga uma, ona o le faamoemoe, o le Aso Faraile 5 Mati 2010 ua tonu e aami ai lo matou

faifeau fou, le Susuga Terry Tatau F.S. ma le faletua.

O le aofaiga o le tau faatatau o le fale fou o le faifeau, fale o le aulotu ma le tanuina o le fanua, na alu ai se tupe e \$360,787.59. O noataga tau aitalafu o nei galuega o loo iai, e \$45,500.

Sa tasi le finagalo o le komiti ina ia malu puipuia faaletulafono le fanua. Aua nei toe oo i fatia ua tuana’i. Na oo mai le Komesina o Fanua ma Fale o le Ekalesia,, Susuga Epati Setefano F.S., ma le fuafanua a le Ekalesia, ma fuaina ai loa le fanua i le aso 8 Tesema 2009. O lenei foa’i o le eleele o Matofa e pule ai le suafa o Faalavane i Lano. Ua uma ona foa’i e Faalavane Sosene ma le aiga mo le Atua ma lana galuega. Sa iai nisi sa faalavelave iai peitai ua teena e le Faamasinoga. O lea ua faamautuina e le Tofa Faalavane Si’u ma ua resitaraina i le igoa o le EFKS i Lano. O le tele o le fanua e tusa ma le 1 1/2 eka.

O loo iai pea le faamoemoe e toe tanu le fanua mo le falesa, ona o le fanua o loo iai nei le falesa, o loo iai ni fefinaua’iga a ni aiga se to’afa. O leni fanua lea ua sii mai iai maota o le galuega, o loo iai le vai o Matofa, ma e faataufusi ma vailoloa. E iai le faamoemoe e tanutanu pea le fanua seia oo ina lelei atoatoa.

O E MALILIU...

Paia. O le Toeaina Faatonu o le matou Matagaluega - Apia i Sasae o Lauina Vui na saunia le lauga.

Na molimau le faifeau, le Susuga Suipi i le la mafutaga ma si ona faletua. O a’u na saunia le molimau a le Pulega. O le A’oa’o Fesoasoani a Fusi o Ma’i Fanolua na molimau e fai ma sui o le Ekalesia. Sa auai le toatele o le aufaigaluega aemaise le Mafutaga a Tina. Na feagai aufaipese o le Matagaluega ma leoleoga i le po a o taoto i lona sa i le maota o le Ekalesia. Aufaipese i Manunu, EFKS Saolufata, Mamona i Fusi, Aso Fitu Fusi, Assembly Fusi ma le EFKS i Fusi.

O le aso na sosoo ai i le taeao i le 11am na tuuvaa atu ai i le Polenisia mai Fagalii mo Tafuna. Na matou

malaga faatasi ai e fai ma sui o le Pulega o Roma Enosa, Tafai Galumalemana ma au nei, Limuaa P. Samuclu Olo.

O le po lava lea na matou malaga atu ai i le Hawaiian Air mo Amerika. O Tacoma i le Setete o Uosigitone na fai ai ona sauniga mulimuli ma lagomau ai. O le aulotu i Fort Lewis, o le aulotu lea na su’e mai ai i Kanana Fou, ma o loo aulotu ai si a la fanua.

Aso Sa Novema 8, 2009 na faia ai le sauniga e le Pulega a USO. Sa taitai le Susuga Tupulua Tagalooa, faifeau Fort Lewis, ae lauga le Toeaina o le Pulega Dr. Iulise Sala. Sa feagai aufaipese pe lima sa iai ma faigaleo, ina ua maea le sauniga i lea afiafi.

O le Aso Gafua, 9 Novema 2009 i le 10am na logo mai ai i le matou Pulega (Anoamaa) le sauniga mulimuli. O le Toeaina ia Faatauolooa

faavaau itulaa e 16

Faiga Lotu Aso Sa o Tupulaga

ai ma Satani, o le tula'i e tete'e i le tofiga o Iosua, ia faaleaogaina. O le finauga a Satani, e faavae i le eleelea o ofu o Iosua le ositaulaga sili. O lona manatu, e lç agavaa Iosua, o loo eleelea, e agasala, e le'i faamamâina ana soligätulafono, e lç talafeagai ona tula'i i luma o le paia o le Atua.

E le'i tâu a i le Atua, Satani ma lana tete'e. Tuu pea o lona lea natura, o le ta'u mai o mea e eleelea ai soo se tagata. Na silasila ma tuu pea le faamamafa a le Atua i lana ositaulaga, lç afaina pe eleelea. E lç o la ea na faia le tagata, i le efuefu ma le palapala? O le natura o le tagata e agasala, e toilalo ma pa'û ifo. Peitai o le Atua na la faia, na te toe faatula'i, na te soloiuese ma faamamâ, na te suia ma faafou, na te toe faaofu i le mamalu ma le matagofie. Pe na eleelea mai nuu ese na tafea ai ma si'omia ai e tapuaiga faapaupau, pe eleelea i lona lava lotofale o Ierusalem, e lç afaina lea; ua sauni le Atua e lagolago, e fa'aaogâ, e ave'ese ona ofu tuai, ae faaofu i ona ofu tatapuvae fou.

O le tasi uiga o le tete'e a Satani, e eleelea le tofi ositaulaga. E manatu e lç toe agavaa le tofi faa ositaulaga, e ta'ita'i le tapuaiga ma mataupu tau o le faaleagaga. Ua sii mai e Satani aso e le'i tupu le faalavelave, faapea o ositaulaga na latou faatupu le toasa o le Atua, na ala ai le Tafeaga. Ua lç toe agavaa la mo le galuega faaleagaga.

O le isi lea vaisû a le tiapolo. Na te faamamafa ni lape ua tuana'i, e faaleaga ai fuafuaga lelei mo le manuia o le lumana'i; na te faitau masei, ia soloia ai faamoemoega lelei o tau ati a'e.

O le agavaa ma le talafeagai, e pule ai le Atua. E pei ona la faatonutonu le taaviliga o mea e tutupu, ma le faasologa o suiga tetele i le lalolagi, e faapea foi ona ia te la le pule ma le faitalia, na te totofi ai, e faatumau pe faaleaogâ o e tutû i ona luma, e faia ana feau i lea augatupulaga ma lea taimi.

O loo finau mai foi Satani, o le eleelea o ofu, o le fa'aaliga o le vaivai ma le faatauvaa o le auauna. O le eleelea o le lç atoatoa, e vaivai ma ausage, e tapulaa lona malosi, e itiiti ma gata mai lona iloa. Peitai e lç afaina lea, auâ o feau a le Atua, e lç faia i ni metotia a le tagata, o le a le ma'ema'e o sona atamai; ae fai i auala a le Atua. O le upu ia Serupapelu, "E lç o le fitalita, e lç o le malosi, a o lo'u Agaga, ua fetalai mai ai le Alii o 'au". E faapena foi mo Iosua, e faapena i soo se tagata faatuatua. E fa'aaoga e le Atua lou vaivai ma lo'u faatauvaa, ina ia fa'aalia ai lona mana silisili ese.

O le eleelea o Iosua, o le eleelea lava lea o

Ierusalem, o le aai o Siona, o i ai le nofoalii o Tavita; o le eleelea o le motumotu na se'ia mai le afi. O le eleelea o le to'aititi ç ua faatotoe e le Atua mo lona faamoemoe. Ua faafia ona taumafai Satani e faaumatia le laau lea, le vine na totû e le Atua, ae lç mate; e totogo a'e pea le tatupu mai le pogai, e tupu pea le La Laau.

O le uiga o lenei fa'aaliga, o le faatoilaloina o Satani, e ala i le aveesea o ofu eleelea o Iosua. O le manumalo o le alofa tunoa o le Atua na te faamagalo ai agasala a le tagata ua la filifilia, le tagata e talitonu ma tapua'i faamaoni ia te la, le tagata e auauna ma osi taulaga e fai lona finagalo. E faamamâ e le Atua, a o pupula i ai mata o Satani. E ui ina mômû a tatau agasala e pei se 'ie 'ulâ'ula, e lava ma totoe le alofa o le Atua, na te faia ia ia sinasina e pei o le kiona.

"Faauta, ua ou aveesea au amioçtonu". Ua na faa'ofuina i tatau, i le mamalu ma le matagofie. O le ofu lava lea, na te aumai faatasi ma le mafanafana, o le malosi fou ma le lototele, pe a tatau fetai'a i ma puapuagâ faa-tafeaga o lenei ola.

O le fa'aaliga e aumai ai ataata o Taulelei; o le faaiite o fanua a lalo. Ua tafa ata o le fa'aali atoatoa mai o le Atua i le lalolagi. O valoaga faasino i le afio mai o Iesu Keriso, o le Ofu a le Atua, mo le faamagaloina o agasala, ma le ta'uamionuina o tatau i luma o le Atua.

O fa'aaliga faasino ia Iesu Keriso, na te faia le galuega faa ositaulaga Sili, na te osi le taulaga ia te la lava, mo le faalalaina o le lalolagi. O le faatinoga o lona taulaga, na faaleelea ai lona tagata pa'ia ma le mamâ, na la tautau faalçlavalavâ ai i luga o le satauro.

Faatatau:

O le galuega ua fai e le Atua e ala i lona Alo pele, o le meaalofoa faa'ifua, mai le tunoa o lona alofa, ma le mutimutivale o lona agalelei. O le galuega e lç toe faaluaina, e tasi ae lasi. Ae o le alafua foi lea ua na a'oa'o mai, e faatino ai la tatau molimau ia te la i le lalolagi nei. O lo tatau tiute faaositaulaga, e faasatauro o tatau ola, ina ia faa'ofu i isi tagata. Faa'ofu e ua eleelea i le ita mai, faamagalo ia i latou. Faaofu e ua lç lavalavâ i tiga ma mafatiaga o le ola nei, ia alofa atu ia i latou. Faa'ofu i e ua lç taualoa ma tuulafoa'iina, ia faamamalu ma faamatagofie.

O sa'afi'afiga a le tupu o Tavita ina ua maluu Saulo, na ia faapea ane, "Afafine o Isaraelu e, ia fetagisi outou ia Saulo, sa na faa'ofu ia te outou i 'ie mômû, atoa ma mea faafiafia; na ia teuteua o outou ofu i auro e faamatagofie a'i." E tele atu mea leaga nai lo mea lelei na fai e le tupu o Saulo, mo le manuia o Isaraelu, ae maise lo la va faata'ita'i ma Tavita. E a Saulo e saili e

fasioti Tavita, ae a Tavita e faamagalo ma faalelei. Ua oo lava i le oti o Saulo, o tau solomua Tavita ona ia sa'afi, ua na faamamalu le igoa o Saulo, ua na faamatagofie lona talaaga.

O la tatau galuega faa'ofu lea, o le teuteu lelei o le va fesoota'i ma isi tagata, ae maise o tatau fili ma e o ita mai. E faamagalo, e faalelei, ma nonofo fealofani. Tainane o loo agaleaga mai, fai e pei o la Tavita, e te manumalo ai pea lava.

O le talitonuga o Tavita, o tiute masani o soo se tupu ma soo se ta'ita'i, o le faa'ofu o ona tagata nuu, i mea lelei uma e manuia ai le soifuaga o aso taitasi. E ave i ai le faamamâ avega, e siitia le tulaga o le soifua a'oa'oina, le soifua maloloina, siitia mai le mativa i le tamaoaga. O tiute masani ia o soo se ta'ita'i, e filifilia e tagata.

Ao le faaofu i 'ofu mômû, ma le teuteu o ofu i auro, na o ta'ita'i faapitoa e filifilia e le Atua, latou te faia. Na o ta'ita'i e moni le alofa, e faamaoni a latou galuega, e amiotonu a latou faa'uga; na o ta'ita'i faatuatua ma matata'u i le Atua, o ç talitonu i le galuega a ositaulaga ma latou fa'aaloalo i ai. Ta'ita'i ia latou te ofoina atu 'ofu mômû ma teuteu 'ofu i auro - e fai galuega faasili, e fai fua galuega faapoopoo, ia sili atu ai le manuia o le tagata lautele ua puapuagatia, nai lo ia ma lona aiga.

O se faamanatu taua lea mo oe Samoa le atunuu pele, i le faatinoga o ou tofi maualuluga, o ou nafa tau tupu, o ou tiute faa ta'ita'i ua faaeaina ai e le Atua. Faafetai mo galuega lelei. Malo le tofa saili mo le manuia o le atunuu. Ao le alofa moni e lç tuua le taugologolo o le galuega faaperofeta a Sakaria. E taua tofi ma tulaga, e taua folafolaga ma ta'utinoga, e taua le tele o fuainumera. E taua pe afai e tino mai, ma oofu ai, ma mafanafana ai ou tagata.

O outou Tupulaga, tama meine, o tupu ma ta'ita'i mo a taeao, ua faataua ma faapitoa lenei Aso Sa mo outou. Ua 'ese teuga ma sikaili ua tou oofu ai i nei aso. Ua faapena foi i auala eseese ua faaleelea ai o outou tino, mafafau ma agaga. Ia outou mataala, ia outou faautauta, leaga ua mata'utia le malolosi o auupega a le tiapolo e faaleaga ai outou. Ua lç o toe ano le tiapolo i le 'au matutua i nei aso; ae ua matuâ aloalo mai i lou talavou ma outou tupulaga.

O la le aposetolo, "Ia oofu outou i ofutau atoatoa mai le Atua, ina ia outou mafaia ona tete'e atu i togafiti a le tiapolo". O outou o le faamoemoega o a taeao, o tupu ma tamalii o aiga ma aliaga, tainane le atunuu. O ta'ita'i o le malo a taeao. O ositaulaga ma faaluuluga o lau Ekalesia i le lumana'i.

faavaau itulau e sosoo ai

Faiga Lotu Aso Sa o Tupulaga

Ia paia lo outou talavou mo le faia o le finagalo o le Atua, ma ia vīa ai lona suafa.

Feagaiga Fou:

E tusa le faaaliga na iloa e Sakaria, ma le Tusi a le Agelu a le Atua i le Ekalesia i Sarataisa. O le Tusi e faasino i ofu eleelea, ma ofu sisina. O Sarataisa, poo Take i aso nei, e fai si ogaoga o le mea o loo eleelea ai. E i ai le igoa ua ola, ae ua oti. O le aai o Sarataisa sa fai ma mitamitaga o le malo Litia, ona o se aai sa maa'e le tamaoiga i maa taua e maua i ona laufanua. O le igoa Sarataisa, e mai le igoa o le tasi maa taua, o le maa e lanu moli-enaena, ae mōmō malosi pe a sulua e le la, ona pei lea o se maa e ola. O le uiga lea o le upu a le agelu, "Ua ia te oe le igoa ua e ola".

O le ulua'i tupe siliva ma tupe auro a le lalolagi na amata e tupu o Sarataisa, e i ai le tupu o Koroesusa. O loo ola mai nei le muagagana, "Ua mauoloa e pei o Koroesusa" (As rich as Croesus). Mea ia e molimau i le logologoā o le tamaoiga o lenei aai o Sarataisa.

O se aai sa malu puipua lona saogalemu; na faigatā ona osofa'i ma lepeti e se vaega'au. Ae ina ua faatamala leoleo o le aai ma lē mataala, na toe malamalama ane Koroesusa, ua pule ai Kuresa le Peresia, na sau faa gaioi ma lepeti le aai.

O se aai e lauiloa lona talaaga faasolopito, o ona ta'ita'i ma mea na tutupu, ua lagomau mai t'iasā; e faamaonia i galuega tetele o i ai, pei ona tusi le agelu, "Ua ou iloa au galuega".

O nei mea uma - o lona talaaga faasolopito, o lona saogalemu, ae maise o lona tamaoiga, ua manatu ai o loo maloloina, o loo mamā, o loo ola. Ae paga lea, o Sarataisa ua sili ona eleelea ona ofu, ua matuā oti lava i le itu faaleagaga.

Aisea?

Ua fai le talafaasolo o le tamaoiga o Sarataisa ma āgaifanua a lea aai. Soo se faalavelave ma mea e fai, e faavae i lana aganuu lea, o auro ma ario a Sarataisa. Ua oo i le Ekalesia na faatua ai i lea aai, ua faapea foi ona sosolo ai ma ana faiga faavae i luga o le āgaifanua ma le tu masani a le atunuu o Sarataisa. O le tapuaiga ma osiga taulaga, o molimau ma le tala'iga o le Tala Lelei, o galuega fai ma atina'e, ua taulamua ma ogatotonu le 'oa ma mea faaletino, ae faamulimuli ma faatauagavale i mea faaleagaga. Ua oo ina latou a'oa'o ma ua talitonu, e tu le Ekalesia i luga o lana aganuu; a leai lana faaSarataisa, ua mate

le Ekalesia; a aunoa lana auro ma lana ario, e lē mafai ona galue le Ekalesia. O se talitonuga valea ma sesē tele lenei.

O Sarataisa e leai ni sauaga i le au Kerisiano, e leai foi ni a'oa'oga sesē faamataupu silisili; o mea o loo sauaina ai isi Ekalesia e G. Ao le mea mata'utia lea ua osofa'ia ma toilalo ai Sarataisa, o le mamafi ma mitamiti i lana tu ma lana aganuu, i lana tamaoiga, ma lona talaaga faasolopito. E sili ona mata'utia, le lagolago atu ma fiafia i ai o le au ositaulaga. Ua mafuli le ola i mea faaletino, ua faamamafa le itu i fafo, ua faalelalolagi le faiga o mea a le Ekalesia. Ua lē fai mea faalogo i le ta'ita'iga a le Agaga Paia, ua leai foi ni fua faaleagaga i le amio ma le ola tapua'i. Ua lima ta'ita'iina e lona tamaoiga. Ua atua ma ifo i ai, ae maise i latou e penefiti mai ai.

Faatatau:

E taua le aganuu, e lelei ma aogā le tamaoiga. Ao le faafitauli, ua avea ma autu, ua fai ma pule, ua ta'ita'i i le Ekalesia. Ua malosi ai le matape'ape'a, ua faatonutonu e le tu'inaanu, ua malo le mana'o i mea o le lalolagi. Mea ia ua faaeleelea ai ofu o le Ekalesia, ua agasala i le tolo'a'i o'oa o le lalolagi, ua lē paia o latou olaga e tusa o lo latou valaauina.

Ua tusi apoapoa'i mai le agelu a le Ekalesia, ina ia salamō, ia toe sasa'a le fafao, ia toe fuata'i le ola faapa'iaina mo le Atua. Ia paia sauniga ma le tapuaiga, ia paia le amio ma le olaga o aso taitasi, ia faamamafa le ola faaleagaga o tagata. Afai e salamō faamaoni, ona faa'ofuina lea o i tatou i ofu sisina - o laei o le manumalo, o le faapaiaina, ma le ola faavavau. Ae afai e lē salamō, afai e lē mataala, e sau o la e pei o se gaioi. E toe malamalama ane, ua 'atia e mogamoga lau Ekalesia.

O E MALILIU...

Mauala na taitai. O a'u na lauga, ma fai le molimau a le Pulega. Tafai Galumalemana na saunia le tatalo. Na molimau le faifeau o Suipi i le la mafutaga aemaise le fanau, faatasi ai ma le latou pese faamavae. Na molimau foi e fai ma sui o aiga le Afioa i le faipule Tutuila o Pulu, faapea le faifeau o Fetulele mai Onenoa.

O le Susuga ia Tupulua Tagalua na feagai ma le sauniga faamavae i le fanuatano i Fort Lewis, Tacoma, ma

Ua vaavaai atu lava ma le faanoanoa, e i ai Ekalesia ua tau faa Sarataisa le faiga. Ua avea le tamaoiga peisea'i o le pule i ana mea uma e fai. Ua faatonutonu ma faalagolago mea uma, i le malosi o le tupe ma oloa, tainane foi le tamaoiga o tofi ma tulaga mamalu, auā o mea lava ia e o faatasi, ua fai ma aganuu.

E sili ona popo'e, ona ua faasolo ina faasili le taua o le tamaoiga faalelalolagi, ma lona sailiga, nai lo le ola faaleagaga o tagata, ae maise i le soifua faaleagaga o Tupulaga pele a le Ekalesia ma le atunuu. O outou alo ma a tatou fanau, o le oloa moni ma le tamaoiga sili lea, o tofi ma meaalofo a le Atua, e sili atu ona taua ma aogā nai lo nisi lava mea. O le faamoemoega lea o a taeao.

Ta'ita'i e, o le atunuu ma le Ekalesia, e mana'omia e Tupulaga lou alofa, lau lagolago malosi ma lau tausiga.

O loo fia oofu, fia aai, fia atamamai i mea faaleagaga. Ao le poloaiga foi lea a le Ao o le Ekalesia, "Ia outou, ne'i tou faaleaogaina se tasi o i latou nei e faatauvaa".

Ao tautau o la i luga o le satauro na ia valaau ifo ia Maria, "Sena e, faauta, o lau tama." Ina ua toe tu mai foi o la, na la poloa'i ia Peteru, "Ia e fafaga i a'u tama'i mamoe." O le valaau lava lea i le Ekalesia, ina ia tausii lelei ana Tupulaga; ia fafaga ia maona ma malilie faaleagaga ana fanau lalovana, ina ia tutupu a'e ma ola, ia fua mai e tautua ma auaua atu ai mo la.

Ia manuia Tupulaga a le Ekalesia. Ia manuia le faafitoga a le atunuu. Ma ia i le Atua le viiga e faavavau. Amene.

O le au mau tofi o le Sauniga:

Faitau Tusi Paia: F. Tuai - Elaine Paniani Betham F. Fou - Vaiuli Lotufafetai (Togo)

Tatalo: Faafetai - Eliko Lupeli (Saleimoa)
Faatoesega - Merita Laloa'i (Utualii)
Manaoga - Moe Lene (Fasitoo-uta)

Lagiina o Viiga o le Atua: Aufaipese tuufaatasi a Tupulaga a le Pulega Malua Sisifo (Levi, Saleimoa, Togo, Utualii, Faleasi'u, Fasitoo-uta, Lepale.)

Taitai o Aufaipese: Susuga Eti Tamati FT
Ta Piano: Quinette E. Tamati

Taimi Pese: Faletua ia Kuinimeri E. Tamati

le pese a le Au Kerisiano e faatofa ai. Talofa uso e tofaina oe.

E silisili i le manatu o le Alii le oti o ona tagata amio Atua. Faafiafia e le Agaga faamaise o le Atua le uso a faifeau ma le fanau, aemaise o le paia o aiga.

Limuaa Pitulua Samuelu Olo
(Failautusi o le Pulega)

'God has filled the world with clues to his presence; the humblest object can remind us that he's in charge.' - Elizabeth in the book: *When God Breaks Through...People Change!*